

四庫全書

子部

欽定四庫全書

子部

藝文類聚卷四十六

詳校官中書臣李彬

負外郎臣牛稔文覆勘

總校官知縣臣楊懋珩

校對官助教臣胡予襄

謄錄監生臣李培

欽定四庫全書

藝文類聚卷四十六

唐 歐陽詢 撰

職官部二

太尉 太傅 太保
祭酒 博士

太尉

春秋合誠圖曰堯坐舟中與太尉舜臨觀鳳皇

圖 授

史記曰孝惠帝六年置太尉官

百官表注曰太尉古官也自上安下曰尉故武官以為

號

月令曰孟夏太尉贊俊傑遂賢良

漢書百官表曰太尉秦官金印紫綬掌武事周勃灌嬰周亞夫等為之

漢書曰呂后問高祖曰陛下百歲之後蕭相國既死令誰代之上曰曹參可其次曰王陵可然少懿陳平可以助之陳平智有餘然難獨任周勃重厚少文然安劉氏者必勃也可令為太尉又曰王龔為太尉在位自非公事不通州郡書記其所辟命皆海內長者

東觀漢記曰張酺字孟侯為太尉父尚在酺每遷轉乃一到洛父來適會正陂公卿罷朝俱賀歲奉酒上酺父壽極歡莫不嘉其榮又曰鄧彪字智伯為太尉在位清白公廉

謝承後漢書曰京兆朱寵字仲威為太尉家貧食脫粟飯卧布被朝廷賜錦被梁肉皆不敢當又曰鄭弘為臨江太守行春有兩白鹿隨車夾轂而行弘怪問主簿黃國鹿為吉凶國拜賀曰聞三公車圖畫作鹿明府當為

宰相後弘果為太尉舉第五倫為司空班次在下每正朔朝見弘曲躬自卑上後置雲母屏風分隔由此為故事

續漢書曰太尉公一人掌四方兵事功勤歲盡則奏其殿最而行賞罰凡郊祀之事掌亞獻

袁山松漢書曰太尉劉虞讓位於羊續靈帝時為三公者皆輸禮錢千萬續舉緼袍以示之曰臣之有唯此而已遂不代虞

華嶠後漢書曰安帝即位太尉徐防以災異寇賊策免就國凡三公以災免始自防也

范曄後漢書曰曹嵩靈帝時貨賂中官及輸西園錢一億萬故位至太尉

應劭漢官儀曰章帝詔曰司空牟融典職六年勤勞不怠其以融為太尉錄尚書事又曰冲帝丁酉策書太尉趙峻二世掌典機衡有匪石不貳之心大司農李固公族之苗忠直不回有史魚之風今以峻為大傅固為太

尉與大將軍龔叅錄尚書事

幽明錄曰常山張顗為梁相天新雨後有鳥如鵲飛翔
稍下墜地民爭取即化為一圓石顗椎破之得金印文
曰忠孝侯印顗表上聞藏之秘府顗漢靈帝時至太尉
齋職儀曰魏文帝黃初二年日食奏免太尉賈詡詔曰
天地之災害罪在朕躬勿貶三公遂為永制而太尉華
歆以疾依田千秋故事乘輿上殿大會遣散騎常侍繆
襲請歆百官總已聽歆至

贊後漢蔡邕太尉陳公贊曰公在百里有西產之惠賜
命方伯分陝餘慶餘慶伊何兆民其觀少者是懷老者
是安綱紀文王文王用平東督京輦京輦用清乃登三
事三事攸寧契稷之佐具于堯庭今則由古於穆誕成
歲後漢崔駰太尉歲曰天官冢宰庶僚之師師錫有帝
命虞作尉苟非其人戮我帝載昔周人思文公而召南
詠甘棠昆吾隆夏伊摯盛商季世頗僻禮用不匡

碑後漢蔡邕楊太尉碑銘曰於戲公惟岳靈天挺德翼

赤精神氤氲仁哲生應台任作邦禎帝欽亮訪典刑道
不忒迄有成光遐邇穆其清又楊太尉碑銘曰天鑒有
漢挺生元輔世作三事勲在王府乃及伊公克光前矩
悉心畢力膺其祖武化洽羣生澤霑區宇又太尉李咸
碑銘曰天垂三台地應五岳降生我公應鼎之足奕世
載德名昭圖錄既文且武桓桓紹續外則折衝內則大
麓又大尉橋玄碑曰岐嶷而超等總角而逸羣至矣乎
初紳高明卓異為衆傑之雄其性莊疾尚華樸有折而

不撓拔賢如逝流討惡如霆擊至德在已揚之由人苟
不矯迹夫何舍焉

後漢桓麟太尉劉寬碑曰公誕受純和之氣體有樂道
寧儉之性疾雕飾尚樸素輕榮利重謙讓劣與同好錫
墳典於茅廬是以根經緯綜精微誨童冠而不倦遷南
陽太守推貞諒以示下顯衆善以厲否惻隱之誠通于
神人故去鞭朴如獲其情弗用刑如弭其姦

晉孫綽太尉庾亮碑曰次黃中以啓曹鍾遐武於軒轅

爰及晉代世號多士公吸峻極之秀氣誕命世之深量
微言散於秋毫玄風暢乎德音闕門者貴其凝峙入室
者議其通玄標形者得之廊廟悟日者期諸濠川提挈
南翔息肩靈越會大君有命納妃德門自求多福辭不
獲已鳳羽籠于華樊麟趾繫于椒房王敦阻兵翫權志
窺神器乃轉公左衛將軍要雄戟以扶華轂勒武旅以
翼豹尾死難之心義形于色親受中詔奔告方伯於是
羣后契盟同稟高謀巖栖懷德以嚮赴義拯神器於獸

叨扶帝座於已傾王室之不壞翳伯舅是賴公以為戰
伐之謀仁所恥聞況立德弘道年幾不惑闔門沈舟將
遠迹山海詔累遣侍中黃門逼以嚴制知不獲免乃固
求外任江外無烽燧之警宇內歸穆然之美銘曰金德
時昏乾綱絕紀素靈南映中宗蔚起誰其贊之數鍾伊
公達人忘懷形隨運通再潛再躍婉若游龍

梁沈約齊太尉王儉碑銘曰瞻旦真而齊軫軼夔龍而
長驚百辟翹首譬列宿之仰望舒千里結轍若派流之

宗江漢及宋道盛運鼎命將改而瞻烏所集未知道歸
公高卧閑宇獨咤虛室眷龍顏以託夢詠日角以興言
佇傳巖之下懷滋水之上慨深版蕩念在濡足霸君亦
慮屬一匡情降三顧卜匪熊羆唯人是與公深覩興廢
妙識人英察榮光於河渚攀龍翼於雲漢傾方寸以奉
國志七尺以事君殊文共會異軫同歸堆案盈几充庭
滿室隨方引應斷決如流辭不輟響紙無停筆精明外
朗神彩傍映矚矚接其光景風雲溢乎帷席驚喧摠至

大薄相填齊鑣共軫竝而不雜銘曰悵公赫矣世載經綸四彼三傑六茲五臣德參世命道亞如仁屣步金門濯纓蘭沚激水上征倍帆鬱起

陳沈炯太尉始興昭烈王碑曰古者帝王之興莫不崇建親屏泰伯讓而退封武哀終而受號則有之矣至若勒功鼎鼎銘德太常清廟尊乎國家揚名顯乎子弟在昭烈王見之焉若夫媯水遙源石砮遐集五絲作而詠南風八世興而和鳴鳳籍帝王之基居正卿之族有由

來矣孔融汝穎之論許其少多傳暢諸公之書頗有賢
哲自漢至魏涉江而東繇邈蟬聯言之耆舊皇上革命
應運大啓邦國麟趾盤石之宗固具金楨玉幹之戚畢
封文叔掩被之悲無泯仲謀援鞍之慟逾切乃封始興
郡王永定元年下詔曰天倫所感義本因心名器追崇
則惟恒典已兄梁故南兗州刺史長城縣公德範沈遽
風度寬厚性與天通深乎靡測昔彈冠入仕譽重城華
宣力艱難遂顧洪業雖時非季漢勢異桓王海內挹其

風流生民懷其大德者矣朕受天明命爰膺寶曆言尋
永往典慕增懷可奉贈太尉公昔之密戚近親宗英令
德若河間之不羣沛獻之受象東平之樂善陳思之藻
麗實聞之也未有身死忠貞名存前代若王之義烈者
銘曰稽古帝舜重瞳有裔曰陳祚土纂虞之系騰波汝
穎承流媯汭四岳有後六奇獻計惟寔惟忠卿長羣公
浮舟震澤佳氣蔥蔥岐周七十商毫百里婉婉中陽帝
出攸止太常景皇季孫讓子天下不踐間之惇史入孝

出忠清輝何已苞指周藏風流懿德言為世範行成士
則名山可鐫豐碑易勒惜哉往矣殞身凶慝鼎命既遷
山河是始光啓代郡德表永祀周以別功魯侯戾止禮
茂廟堂恩加松杞

墓誌梁沈約齊太尉文憲王公墓誌銘曰德被九官功
苞十亂帝圖必舉皇猷諧煥斯謂國楨是惟民幹翺翔
禮園優游文館秘義烟涵瓌辭雨散揜路揚輝台庭改
觀方翊隆平變茲天網福履每愆降年多爽微言永謝

庶僚誰長饒吹罷音松風代響

梁沈約齊太尉徐公墓誌曰公美風儀善言笑愛重琴
碁流連清賞拓宇東郊暖然閑素榮貴之來無槩懷抱
任居端揆萬務同歸簿領盈前驚塵滿席直舉枉錯虛
來實反天道不仁與善寔應

北齊邢子才太尉韓公墓誌銘曰立事立言是為弗替
且公正德實兮不朽雖將相無種而公卿有門是以萬
鍾四牡烏奕於往代長組高冠陸離於前祀及負笈追

倍結友從師先難後易身佚功倍皆神遊隅隙理合精
微非存甯越廢寢食以存道久殊高鳳志冠履以成業
皎皎獨照旁絕鷺萍亭亭孤鶴入自雲霞忘情譽毀同
嗣宗之於善惡齊心得喪若叔夜之於愠喜方將受在
三九追蹤二八弘大道以事一人數至理以安百姓而
天德不厚神聽多愆仁勇一亡辯智同盡

晉盧諶太尉劉公誄曰公侯之生固天攸擢高智蕭條
英風卓犖勵操宏壯抗意崇邈雅用深奧明鑒朗出搞

藻雲浮飛辯盆溢驅其豺狼斬其藜藿建立市朝營置
亭徼劉聰南比猗盧北接或以恩變微我公侯方事焉
捷委重于外弛禦于中制比鄧禹禮優竇融

碑梁王僧孺為臨川王讓太尉表曰臣聞一足以長望
千里而成累空輸易騁觸三尺而不登苟曰違方難用
道遠安車駟馬望高闕而朝至繡服緹麾輶康衢而暮
返行瞻盡廐居對蒼龍陛下海涵春育日鏡雲仲追大
道之無私惜微臣之宜極

後魏溫子昇西河王謝太尉表曰臣聞拂羽決起力謝
摩天策蹇載馳功微送日將短嗣難以陵高駕乘無由
致遠雖復建旗出郡未追楚趙之風捧壺入侍徒踵金
張之迹及天祚明德運啓興王六遂始遷九鼎初定於
焉承乏有用當官草靡從風未遑克讓常恐執轡輕輪
操刀傷錦

太傅

大戴禮曰傳傳德義又曰天子不惠於庶民不信於諸

侯不戒於戎事不誠於賞罰凡是之屬太傅之任也

尚書曰成王黜殷命滅淮夷歸豐作周官立太師太傅
太保茲惟三公論道經邦變理陰陽官不必備惟其人
賈誼書曰昔文王使太公望傅太子發嗜鮑魚而公不
與文王曰發嗜鮑魚何為不與太公曰禮鮑魚不登乎
俎豈有非禮而可以養太子哉

東觀漢記章帝詔曰行太尉事衛尉趙憲三世在位為
國元老其以憲為太傅

續漢書曰每帝初即位置太傅錄尚書事薨輒省

應劭漢官曰太傅古官也周成王康叔為之高后元年
初用王陵金印紫綬八年省哀帝元壽二年復置位在
三公上世祖中興特遣使者備禮徵故密令南陽卓茂
策曰夫士誠能為人所不能為名冠天下當受天下重
賞故武王誅紂封比干之墓表商容之間今以茂為太
傅封宣德侯

曹植輔臣論曰蓋精微聽察理析毫分規矩可則阿保

不傾羣言系于口而研撫是非與詰總乎心而唯所用之者鍾太傅也

齊職儀曰太傅品秩冠服同太宰成王即位周公為太傅遷太師秦無其職漢惠帝崩呂后以右丞相王陵為少帝太傅位在三公上魏黃初七年詔太尉鍾繇為太傅華歆為太尉並以疾依田千秋乘輿上殿後三公有疾多以為準

沈約宋書曰晉宣帝為魏太傅誅曹爽後置左右長史

掾屬舍人各十人事既非常加又領兵非准例也

歲晉齊王攸太傅歲曰伊昔上皇建國立君仰觀天文
俯察地理創業恢道以惠于民承祀祚延統重故援立
太子尊以弘道固以貳己儲德既立邦有所恃固親以
道勿固以愚修身以敬勿託以尊自損者有餘自益者
彌昏

碑後漢蔡邕太傅胡廣碑銘曰用能七登九命篤受介
祉亮皇聖於六世嘉庶績於九有窮生民之光寵享黃

者之遐紀蹈明哲以保身與福祿于終始五蹈九列七
統三事和神人於宗伯治水土於下台光弼六世歷載
三十自漢興以來鼎臣元輔未有若公者焉覩臯陶之
闡壺窈孔氏之房奧通水源於潤下繁后土於稼穡訓
五品於羣黎理人倫於區域曜三辰于混元協太和乎
皇極傳聖德於幼冲率旦與之舊職

晉孫綽太傅褚褒碑曰公資清剛之正氣挺純粹之茂
質深量體於自然冲識足乎弱冠含章內映而不運皦

察之明玄識沈通而不以浮藻曜物穆然忘容塵務不干其度默爾獨得膚受莫測其奧加以溫恭孝友少思寡欲都督兗州刺史將以藩屏畿甸綏授分內會康皇晏駕太后臨朝總已之重民無異望乃徵將軍中書令錄尚書事公要終之識定於介石雖事已未來而情以本應顧以主少國危方難未夷思清亟夏以一天宇且帝命所存以社稷為寄謀身雖重方此為輕深為意疾俛首撫順公志在芟夷克類拯拔晉民繕甲練卒日不

暇給者久矣遂見機而作遺其劒履將龍馬河洛電掃
司豫廟筭以逆徒尚繁困獸難逼命公還旆以俟齊舉
雖元勲未捷義聲亦足以振暴於華夷矣銘曰邈邈遠
遊亶亶令圖將激淮海灑滌中區雅業未究哲人其徂
敢勒玄石敬刊高謨

晉孫楚故太傅羊祜碑曰稟二儀之純靈膺造化之冲
氣文為辭宗行作世表遷黃門侍郎受秘書監公筭滅
吳之畧以為孟獻營虎牢而鄭人懼晏弱城東陽而萊

子服乃進據險處開建五城收膏腴之地奪敵人之資
於是江浦馳義旌負而至雖研精軍政用思滅敵然兼
立學校闡揚典訓是以搢紳之士鱗集仰化雲翔衡門
雖泮宮之詠魯侯菁莪之美育才無以過也銘曰金德
發曜惟公作輔肇造嘉謨建我民主不慙遺公俾屏聖
皇哲人其徂孰不增傷

周王褒太傅燕文公于謹碑銘曰古者六等官人師傳
崇其匡輔一命作牧侯伯總其專征南仲成薄伐之功

吉甫作來歸之頌若乃仰叶宸睢上屬台階錫之以彝
器明之以車服除名盛業太傅燕國公其有焉西曄開
其命緒東海傳其世祿父曾致平法之科廷尉稱無冤
之頌駟馬方駕高門繼軌公稟山岳之上靈含風雲之
秀氣雕良玉於廉剡鍊貞金於滄溟于時王業締構國
步權輿太祖地雖二公功猶再駕忠誠簡帝有志興王
公運策帷帳叅謀幕府封齊定文成之計間楚資曲逆
之奇仲華訪輿地之圖林叔參兵車之右魏恭帝元年

為大司寇正刑糾慝國無害馬之倫翦暴詰姦民亡飲
羊之俗三刺薦無簡之文兩造陳禁邪之憲大周受命
寶歷攸歸表高惠之功臣紀山河之著命封燕公邑萬
戶姬氏建國君與始封昭王禮賢郭隗開館又授太傅
本官如先保定五年賜金石樂一部公世為邊將少習
兵書當敵制機臨戎應變增壘減竈之圖題樹繫桑之
略軍中罷戰無廢雅歌壯士志驕時觀投石及平名高
衛霍爵重韓彭錫邑增於鄭僑賜乘同於魏絳丹節比

司隸之貴緹騎埒金吾之寵座闕倡歌之娛堂無鐘鼓
之奏辭功坐樹不伐征西之勲還第角巾無競龍驤之
賞銘曰惟岳降神膺期命世量苞川藪道弘兼濟昴宿
協符佐旌冥契匪躬諒直武節橫厲玉嶠重險鍾鼎淪
覆潛龍勿用瞻烏在屋道贊上台功匡上瀆條教斯理
彝倫載睦懋官惟德明試以功既移上將實董元戎傳
呼甚寵徽章載隆居高能降處貴思冲寶命惟新王猷
允塞爵班異姓禮均同德林胡以南易州之北帝曰爾

諧俾侯燕國駸駸過隙滔滔川逝明哲詎寶館舍長捐
立言不沒遺愛在旃三河斥土駟馬開泉丹旒毀宗玄
堂啓殯寵贈虛加鸞和空引晏子悼齊隋武懷晉謂天
蓋高如何不慙

表陳沈炯為陳太傅讓表曰秦六代之舞不能祚天具
百神之歌無以動聖廷首當閭轉增危慄百川沸騰百
室如燬釋位同謀諸侯總至盟書會府餘臣一人若使
幅巾衡巷口絕平吳朝遊赤松暮過濟北出就侯服入

褫龍章則四郊有壘誰守社稷如其雄戟在前強弩自
衛負孺子之圖飾綠鵲之鼎軍威重於護將國禮貴於
寒門則臣道尚卑孰云非逼臣所以出謝公卿入訓妻
子拜長陵之園謁太祖之廟不以九族違恩義不以百
姓負國家所期陛下與比極同壽朝廷與南山同固

太保

應劭漢官曰太保古官保養也

呂氏春秋曰荆文王得茹黃之狗宛路之矰以田於雲

夢三月不返得丹陽之姬暮年不聽朝保申曰先王以臣為保今王暮年不聽朝王之罪當笞王伏臣將笞王王曰敬諾保申束細箭五十跪而加之于背如此者再謂王曰起矣王曰有笞之名一也遂致之保申曰君子恥之小人痛之恥之不憂痛之何益保申趨出請死罪大王曰此不殺之過也保申何罪王乃殺茹黃之狗折宛路之矰放丹陽之姬兼國三十保申之力也

賈誼書曰天子處位不端受業不敬教誨諷誦詩禮不

經不法言語不序凡此其屬太保之任也

王隱晉書曰王祥字休徵琅琊人泰始元年拜太保三年春御史中丞侯史光上言曰祥久以疾病闕廢朝會應免官詔曰太保朕所毗倚以隆道弘治者也前後遜讓不從所執此非有司所得議也

齊職官議曰太保品秩冠服同太宰成王即位召公為太保召誥云越三日戊申太保朝于洛

逸禮曰太公為太師周公為太傅召公為太保

沈約宋書曰太師太傅太保為三公訓護天子導以德義天子加拜待以不臣之禮非人則闕矣漢制保傅在三公上號曰三公自後常然

碑周王褒太保吳武公尉遲綱碑銘曰昔者王室藩屏周德謂之宗親列國諸侯異姓稱為伯舅元勲懿德姬宗齊楚之霸疏爵酬庸漢重韓吳之秩司勳載其弘烈典冊備其徽章山甫式列辟之功紀迹庸器莊叔匡成獻之難昭德彛鼎鴻名盛業公實兼焉公命世挺生應

期間出高華峻極降惟岳之上靈霜露所均體中和之
秀氣危松擢本且觀後彫之質貞桂挺生便體冬華之
秀是故以辰昂膺慶風雲玄感者焉公柔順內凝英華
外發斧藻仁義珪璋令範危勁之節冠四序而踰秀堅
貞之操經百鍊而不銷加以達門射法遠中戟支養由
箭神遙穿懸葉巧極將軍之技精窮校尉之官及年踰
艾服任隆台衮甲第當衡傳呼啓路不以寵貴驕人每
以卑恭自牧易簪之言無忘寢瘠城郢之志終於瞑目

銘曰珠角應期山庭表德出忠入孝自家刑國人物冠
冕彛章表則任屬屯警官聯極侍行部六條議班三吏
逝水詎停光陰不借遽辭逆旅俄悲恒化旌舒夏鍊棺
陳衛幕北郭人希西山景落三千不見九原誰作銘茲
鼎鼎永傳蒿霍又太子太保中都公陸逞碑銘曰公本
居三吳郡三吳縣丞相遜後也宋武匡定鍾鼎底平涵
洛公曾祖載實贊軍謀及反旆南轅以司武留守赫連
作亂見拘夏州以江右名家為中山太守地既鮮虞途

通靈壽呼范易水仗武乘邊趙北燕南申威河外祖營
州使君長於戎馬稱雄朔漠南中都督猶續奕世之基
西校國門無墜承家之業公識度深詳標尚閑遠處衆
撫謙居簡行敬風鑒外明潛機內敏建章門戶張華成
立原陵松柏虞廷盡記昔處文房又居內職或傳冰華
時遊甲邸魏祖軍謀還豫南陂之宴梁王師傅猶對宣
室之談出內優隆通籍榮寵升降榮步便頌官禁銘曰
淮海維揚具區之藪水朝江漢星躔牛斗盛德遺風神

明厥後龍章八命鸞旂四牡賓階昔遇風月相思卿門
今別宿草何悲輪環不已零落無時永矣元伯長從此
辭

周庾信太保鴈門公紇于弘碑曰公本姓田氏虞賓在
位基於揖讓之風鳳凰于飛紹於親賢之國論其繼世
之功則狄城有廟序其移家之始則長陵有碑况復高
廟上書小車而對漢祖聊城祭鳥長兵而驅燕將公以
胎教之月歲德在寅誕載之辰星精出鼎既而受書黃

石意在王者之師揮劍白猿心存霸國之用常願執金
鼓而問吳王橫琱戈而反齊地有志不就忠貞死焉銘
曰移茵返葬提樞山行靈墟隴水哀挽長城山如北邙
樹似東平松門石起碑字金生眇眇山河荒荒瘠子泣
血徒步奔波千里孝水先枯悲雲即起世數存沒哀榮
終始

祭酒

韋昭辯釋名曰祭酒者謂祭六神以酒醊之也辯云凡

會同饗讌必尊長先用先用必以酒祭先故曰祭酒漢時吳王年長以為劉氏祭酒是也

漢書曰張安世薦蘇武明習故事奉使不辱命先帝以為遺言宣帝即時召武待詔宦者署數進見復為右曹典屬國以武著節老臣令朝朔望號稱祭酒甚優寵之風俗通曰詩禮春秋至齊襄王時而孫卿最為老師齊尚修列大夫之缺而孫卿三為祭酒也

蜀志曰先主既定益州廣漢太守夏纂請秦宓為師友

祭酒

百官表注曰博士祭酒一人掌國子學早朝服進賢兩梁冠佩水蒼玉秦燔書籍而置博士之官博者博通於藝事也

齊職儀曰晉令博士祭酒掌國子生師事祭酒執經葛巾單衣終身致敬

沈約宋書曰博士秦官也常通古今員多至數十人有僕射光武增為十五人蓋一經有數家之學故也皆教

弟子光武改僕射曰祭酒祭酒者一位之元長也

表齊王融為王儉讓國子祭酒表曰竊以庠均義重振
古所崇資師道尊有來攸尚匪曰蘭芷疇變入室之情
不自朱藍何遷素絲之質又表曰况臣仁慚富侶德謝
潤身識陋令經器非匣重何以昇陞道於殊身反斯文
於邇日將使良璣修竹無增瑩羽敬遜務時遂寯星歲
又表曰臣聞修危方湛弱露露而取覆懸衡紀正輕塵
委而必移况臣才非應俗用乖知治取其集木飲氷旌

懸輪驚方臣之念未足言矣

後魏溫子昇為安豐王延明讓國子祭酒表曰臣聞寶
劍未砥猶乏切玉之功美箭闕羽尚無衝石之勢況才
非會稽之竹質謝昆吾之金至於敷教東序流訓上庠
置樽候酌懸鐘待叩必須蘊朱藍以成彩立規矩以為
式垂三行於貴遊揚六藝於胄子而臣學愧聚沙問慚
攻木雖歷文史不治章句於茲曠官青衿何仰

博士

應劭漢官儀曰博士秦官也博者通博古今士者辯於
然否孝武建元五年初置五經博士太常差次有聰明
威重者一人為祭酒總領綱紀

漢書曰賈誼洛陽人年十八以能誦詩書屬稱於郡中
文帝詔以為博士是時年二十餘最為少每詔令議下
諸老先生未能言誼盡能為之對人人各如其意所出
又曰公孫弘對策時百餘人太常奏弘第居下天子擢
弘對為第一召八見容貌甚麗拜為博士待詔金馬門

東觀漢記曰桓榮授皇太子經每朝令榮於公卿前說經上曰得卿幾晚因除博士

范曄後漢書曰董平永初為博士時草創五郊祭祀及宗廟禮樂威儀章服輒令均參議多見從用為當世通儒

李郃別傳曰郃上書太后數陳忠言其辭不能盡施用輒有策詔褒贊焉博士著兩梁冠朝會隨將大夫例時賤經學博士乃在市長下公奏以為非所以敬儒德明

國體也上善公言正月大朝引博士公府長史前

漢舊儀曰武帝初置博士取學通行修博識多藝曉古
文爾雅能屬文章為高第朝賀位次中都官吏稱先生
不得言君其真弟子稱門人又曰孝文皇帝時博士七
十餘人朝服玄端章甫冠

晉令曰博士皆取履行清淳通明典義若散騎中書侍
郎太子中庶子以上乃得召試諸生有法度者及白衣
試在高第拜郎中

魯國先賢傳曰漢文帝時聞申公為詩最精以為博士
申公為詩傳號曰魯詩

典儀曰公儀休者魯博士也為魯相無所愛更百官自
正使食祿者不得與下爭利

殷氏世傳曰殷亮建武中徵拜博士遷講學大夫諸儒
講論勝者賜席亮重席至八九帝嘉之曰學不當如是
邪

郭子曰張憑舉孝廉詣劉真長還船須臾真長至遣覓

張孝廉船同旅愕然既同載俱詣撫軍劉前進謂撫軍曰為公得一士太常博士之妙選既前撫軍與之言咨嗟稱善乃曰張憑勅宰為理窟即用為太常博士

歲漢揚雄博士歲曰洋洋三代典禮是修畫為辟雍國有學校侯有泮宮各有攸教德用不陵昔在文王經營其軌勗于德音而思皇多士多士作楨惟周以寧國人興讓虞尚質成公劉挹行潦而濁亂斯清官操其業士執其經昔聖人之綏俗莫美於施化故孔子觀夫人之

學而知為王之易大舜南面無為而衽席平還師階級
之間三苗以懷秦作無道斬決天紀漫彼王迹而坑術
士

表梁丘遲為王博士讓表曰臣聞撫臆可以言心量能
則知所止是故矯親魯門簡業事亡雜吹齊稚分聲遽
逝臣才行過污文質無廉疎達謝於谷杜決洽乖夫劉
楊非除部養之勤豈通掌固之業

藝文類聚卷四十六

欽定四庫全書

藝文類聚卷四十七

唐 歐陽詢 撰

職官部三

大司馬
儀同

司徒
特進

司空

大司馬

韋昭辯釋名曰大司馬司馬武也大總武事也大司馬
掌軍古者兵車一車四馬故以馬名官

春秋運斗樞曰黃帝與大司馬容光觀鳳銜圖置黃帝
前

尚書曰司馬掌邦政統六師平邦國

周官曰大司馬之職掌以九伐之法正邦國

毛詩曰祈父予王之爪牙

管子曰涼風至白露下天子命左右司馬全組甲勵士

衆

漢書百官表曰武帝元狩四年初置大司馬以冠軍印
綬置官屬成帝綏和元年賜大司馬金印綬置官屬祿
比丞相

東觀漢記曰今以平狄將軍孫咸行大司馬以名應識
王隱晉書曰石苞泰始之初拜大司馬舊參軍於都督
無敬故孫楚抗衡於苞苞以楚傲更相表理參軍有敬
自楚始也

晉中興書曰王猛少貧賤鬻舂為事嘗至洛陽貨舂有
人於市貴買其舂云家近在此可隨我取直隨去忽至
深山此人曰且住當先啓道君須臾猛進見一公踞胡
牀頭白將從十許人有一人引猛云大司馬公可進猛

因拜老公公曰王公何緣拜即十倍售畚直發人送猛
出山既出顧視乃嵩高山也

博物志曰太公望為灌壇令文王夢見婦人當道哭問
其故曰吾泰山之神也嫁為西海婦灌壇令當吾道不
得作風雨夢覺召太公是日果疾風暴雨文王乃拜太
公為大司馬

晉公卿禮秩曰司馬大台兵官也

魏氏大司馬大將軍各自為官在三司上晉以石苞為

大司馬次三司下

齊職官儀曰大司馬品第一秩二千石金章紫綬武冠
絳佩朝服佩山玄玉其在少昊則睢鳩氏之任顓頊以
司馬主火堯命羲叔為司馬夏官也虞夏二代以司馬
夏官棄居其職周成王以畢公高為司馬楚漢之際曹
無咎周殷始居其職

誅後漢杜篤大司馬吳漢誅曰篤以為堯隆稷契舜嘉
臯陶伊尹佐殷呂尚翼周若此五臣功無與疇今漢吳

公追而六之乃作誄曰朝失鯁臣國喪爪牙天子愍悼
中宮咨嗟四方殘暴公不征茲征茲海內公其攸平泯
泯羣黎賴公以寧勲業既崇持盈守虛功成即退挹而
損諸死而不朽名勒丹書功著金石與日月俱

魏陳王曹植大司馬曹休誄曰於穆公侯魏之宗室明
德繼踵奕世純粹闡弘汎愛仁以接物藝以為華體茲
亮實年沒弱冠志在雄英高揖名師發言有章東夏翕
然稱曰龍光貧而無怨孔以為難嗟我公侯屢空是安

不耽世祿親悅為歡好彼蓬樞甘此瓢簞味道忘憂踰
憲超顏矯矯公侯不撓其厄呵叱三軍躬奮雄戟足儼
白刃手接飛鏑終弭淮南保我疆場

晉陸機吳大司馬陸抗誄曰我公承軌高風肅邁明德
繼體徽旨奕世昭德昭德伊何克俊克仁德周能事體
合機神禮交徒候敬睦白屋踧踖曲躬吐食揮沐爰及
鰥寡賑此惻獨孚厥惠心脫驂分祿乃命我公誕作元
輔位表百辟名茂羣后因是荆人造我寧宇備物典策

玉冠及斧龍旂飛藻靈鼓樹羽質文殊塗百行異轍人
玩其華鮮識其實於穆我公因心則哲經綸至道終始
自結德與行滿英與言溢

章梁簡文帝為南平王拜大司馬章曰臣度連宸夢地
寔璿跼王業權輿夙奉締構爰頌盧綰同贊密謀豫均
鄧禹俱奉明詔故搏飛九萬實假扶搖之力冲天百尺
無俟剗剗之勞

司徒

尚書曰百姓不親五品不遜汝作司徒敬敷五教在寬
又曰司徒掌邦教敷五典擾兆民

周官曰大司徒以土圭之法測土深淺日至之景尺有
五十謂之地中天地之所合四時之所交也風雨之所
會陰陽之所和也然則百物阜安乃建王國焉

禮記曰司徒脩六禮以節民性明七教以興民德齊八
政以防淫一道德以同俗養耆老以致孝

毛詩曰緇衣美武功也明有國善善之功

管子曰昔者黃帝得祝融辨南方故使為司徒

東觀漢記曰袁安為司徒每朝會憂念王室未嘗不流涕又曰郭丹為司徒在朝名清廉公正

續漢書曰司徒公一人掌人民事凡教民孝悌遜順謹儉養生送死事則議其制建其度凡四方民事功課歲盡則奏其殿最而行賞罰凡郊祀之事嘗省牲視濯

謝承後漢書曰劉寵為司徒臥麕布被

蔡邕鍾鼎銘序曰惟建寧四年三月進公登于玉堂前

庭乃制詔曰其以司空喬玄為司徒公拜稽首三讓然後受命

典略曰契為司徒百姓和親夔主賓客遠人畢至

九州春秋曰靈帝賣官崔烈入錢五百萬以買司徒烈子均亦有世名烈問曰吾作三公天下論何如均曰大人少有高名不謂不當為公但海內嫌銅臭爾

吳錄曰丁固為司徒初為尚書夢松出其腹謂人曰松字十八公後十八年吾其公平遂如夢

王隱晉書曰魏舒為司徒年過致仕有謙謙意而無居宅乃漸以俸秩餘為第一所九年正月朝會罷送還家奉送章綬又曰武帝以山濤為司徒頻讓不許濤出徑歸家左丞白褒奏濤違詔詔杖褒五十又曰王戎代王渾為司徒高選長史西曹掾委任責成形狀短陋而目明徹威儀不足常乘馬輦無日不出以象牙籌晝夜筭家財遠及田牧性又儉不能善自奉養飲食通財不外出天下之人謂之膏肓之病

晉中興書曰劉隗從兄疇字王喬有重名司徒蔡謨每歎曰若使劉王喬得南渡司徒公之美選也又曰蔡謨讓司空孝帝臨軒自平旦至日中使者十餘反而謨不至孝帝時年八歲甚怒之極問左右曰所召何以不至今來臨軒何時當竟皇太后詔曰必不來者宜罷朝中軍殷浩奏曰免吏部尚書江彪官於是公卿奏送謨廷尉以正刑書謨懼率子弟素服詣闕到廷尉待罪詔可依舊制免為庶人

齊職儀曰司徒品秩冠服同丞相郊廟服冕同太尉漢
哀帝從朱博議始置三司改丞相為大司徒以孔光為
之魏以華歆為司徒

江氏家傳曰江統字應元時太傅從事中郎庾子嵩以
風韻見重亦竝雅敬君德庾中郎每云當今可以居司
徒克民望者江生其人也

歲漢崔駰司徒歲曰天監在下仁德是興乃立司徒亂
茲黎蒸茫茫庶域率土祁祁民具爾瞻四方是維乾乾

夕惕靡怠靡違恪恭爾職以勤王機敬敷五教九德咸
事吾民用章黔萌是富

碑宋傅亮司徒劉穆之碑曰公諱穆之字道和彭城人
也公膺陶鈞之秀範該生民之上操三變肇於弱容九
德充於初迪文明在中柔順暢於事業敬以直內義讓
洽於州黨時元兇竄遁擁據荆沔乘輿播幸越蹈九江
公率先羣后電發川湄獎懷本之衆勵思奮之士栢謙
籍累葉之資徐履坦驟勝之鋒習亂之徒若蝟毛而起

內懷根本之虞外通首尾之勢公靈武獨運奇謀內湛
鞠旅陳衆視險若夷飛雲西泝則水截鯨鯢乘轅東指
則陸殪長蛇迴累恭之危成維山之固豐功茂勲大造
於王室淳風懿化永結於荆南銘曰二儀發揮川嶽協
靈外恢溫雅內鏡文明懷仁履順蘊義居貞煌煌衮衣
禮亦隆止翼翼素心亮終如始夷情升降一色愜喜訓
儉於物復禮于已

墓誌後魏溫子昇司徒元樹墓誌銘曰昔樞電降祥姬

水成業握八符以馭世膺五命以會昌欽明格於上下
先宅被于宇宙卜年永久歷世遐長有文王之孫子啓
周公之苗裔積善所及踵武稱賢每以辛李為言恒持
韓白自許殫百慮之一致盡能事於生民蒼蒼在上義
歸無厚徒有東平避世之意空懷北海自晦之情疾非
逢霧終異啓手銘曰明允篤誠發於歧嶷未鏤已雕不
扶而直修禮以耕強學為殖孔既歎魯莊亦吟越況以
度思有懷明發翻然高舉歸于魏闕長路未窮朝光已

沒又司徒祖瑩墓誌曰自天命生商王居徙亳源源誌
遠枝葉繁華祖德潤於身聲高邦國父行成於已名重
京師公鍾美多福資神積善器局閑靈志識開悟口含
碧雞之辨手握雕龍之文門有善業家傳慶靈礪金成
器相遺滿籛琢玉為寶待價聯城匪直也人實惟有道
言析秋毫辭連春藻

梁沈約為司徒謝朓墓誌銘曰嶽神昔降和氣令鍾以
彼天爵爵為人龍崇墓往峻世德今重漢車作傳靈位

攸待我君應符非公莫宰華袞既襲輕羅自改形雖廟
堂心猶江海經邦已備皇情迴屬素緋輟柳玄雲罷曲
誅後漢張衡司徒呂公誅曰昔呂皇祖帝交之緒伯夷
秩唐唐宗允叙四嶽在虞傅士佐禹克厭帝心姓姜氏
呂登是南邦以家以處降及于周穆侯作輔寡于九族
九族用寧登受八命衮職靡傾黃耳金鉉公餗以盈綽
兮其寬皦兮其清既明且哲式保令名苻旂從風駟牡
超驤去此寧寓歸于幽堂玄室冥冥修夜彌長

梁簡文帝司徒始興忠武王誄曰皇源地闡帝業天維
於穆忠武光國之基爰自弱齡英明播越玉潤冰鮮山
靜雲發帝曰爾諧僉議彼屬推轂兩江建旗三蜀將旋
上國戀結四民三鱣表服二鹿隨輪方變正袞永範時
規天弗報善哲人其萎響哀挽於北邙去承明而不入
望參差之流影聽潺湲之雨泣

章宋謝莊北中郎新安王拜司徒章曰不惟震施罔匱
鴻慶方稠變調之重遂臻非據智小謀大周家興規少

陽微暄有鑒前史辨其動植布其安擾以倡九牧阜成
王教豈臣眇末所能克荷又為北中郎將謝兼司徒章
曰臣聞變理陰陽寅亮天地弗惟其官無人則闕司徒
掌敷五典職擾兆民豈悟乾靈罔置光渥方闡不次之
任殊絕藩岳豈可權尸三事假備六符慙震周迴顧步
交悽

表吳筠揚州建安王讓知司徒表曰臣聞玄黃之馬事
絕於銜鑣蟠朽之材飾乖於丹漆何則千里之志已窮

萬乘之器無取遠物近身於焉在譬

後魏溫子昇為司徒高敖曹謝表曰委水橫流羣龍交
戰徒悲道喪空懷主辱雖復見義援戈臨危奮劍顧慚
後嗣終謝先鞭事等泣河無救三川之竭有類憂天豈
支四極之壞

北齊邢子才為潘司徒樂讓表曰武皇帝運屬繼元事
深微禹推蚩尤之陣破尋邑之師義開金石理勗庸駘
遂曰奉羈勒有事風塵徒備鳥背之毛曾無馬筴之力

司空

春秋元命苞曰危東六星兩兩而北曰司空主水

尚書曰僉曰伯禹作司空帝曰俞咨禹汝平水土惟時懋哉又曰司空掌邦土居四民時地利

禮記曰司空執度度地以居民量地遠近興事任力

尚書刑德攷曰禹長於地理水泉九州得括象圖故堯以為司空

家語曰孔子初仕為中都宰二年定公以為司空乃別

五土之性而物其所生之宜咸得厥所

漢書曰御史大夫秦官副丞相成帝綏和九年更名大司空祿比丞相

東觀漢記曰杜林代張純為大司空務於無為第五倫為司空奉公不撓言事無所依違

續漢書曰張奮為司空時歲災旱祈雨不應乃上表即時引見復口陳時政之宜帝召太尉司徒幸洛陽獄錄囚徒大雨三日又曰王梁字君嚴赤伏符曰王梁作主

武玄武水神大司空水土之官也於是拜梁為大司空
袁宏漢紀曰第五倫為司空有人與倫千里馬者倫雖
不取每三公有所選舉倫心不忘也然亦終不用

華嶠後漢書曰伏恭為太僕帝臨辟雍於行禮中拜恭
為司空儒者以為榮

魏志曰徐邈拜司空歎曰三公論道之官無其人則闕
豈可以老病忝之哉固辭不受

典略曰禹為司空披九山通九澤決九川定九州使各

以其職來貢

華陽國志曰趙瑤字元珪自扶風太守來之郡司空張
溫謂曰第五倫昔從蜀郡為司空今掃吾第以待足下
荀氏家傳曰荀爽字德明董卓徵公公到府三日策拜
司空起巖穴九十五日而為台司世人號曰白衣登三公

晉中興書曰陸玩字士瑤王導都鑒庾亮相繼殂朝野
憂懼咸以為三良既沒國基墜矣於是遷玩侍中司空

給羽林四十人玩比陳讓不聽既拜歎息謂賓客曰以我為三公是天下無人也談者以為知言

齊職儀曰司空品秩冠服同太宰舜以禹為司空成王以毛公為司空宋以武公之諱改司空為司城楚改司空為莫敖秦置御史大夫省司空

贊魏楊修司空荀爽述贊曰生應正性體舍中和篤誠宣於初言明允朗於始察是以在童胤而顯奇漸一紀則布名須幼之可師甘羅之少者何以踰公之性量乎

砥心六經探索道奧瞻乾坤而知陰陽之極載而集之
獨說十萬餘言士林景附羣英式慕由毛羽之宗鵬鷺衆
山之仰五嶽也昔楚思叔敖而作歌鄭謳子產而興歎
瞻望弗及作詞告思詞曰爰在大漢挺荀作貞其德允
明誕發幼齡行蠲體潔如玉之瑩確乎其志乃勵乃清
遂陟司空天子是毗惟君之德朋僚所咨清水平土茂
哉是力將混六合繩以正直散以禮樂風以道德

晉孫綽賀司空循像贊曰公應天縱之德系命世之期

質與荆玉參貞鑒與南金等照若其好學之性不勸而
而成弱不珍玩雅好博古慨洙泗之邈遠悼禮樂之不
舉於是覃思深講銳精幽贊雖齊孝之歸孟軻漢王之
宗仲舒無以加焉贊曰思文公侯誕保休祥素質玉潔
華藻金章總角韞德被褐韜光自昔喪亂征鼓日震禮
樂藏器詩書蒙塵哲人遐慨垂幙澄神仰觀洙泗揚波
絕津方曜金鉉協贊衡機昊天不弔會不慈遺縉紳頽
範皇德莫毗公之云徂華裔同悲

歲漢楊雄司空箴曰普彼坤靈侔天作則分制五服劃
為萬國乃立地官空惟是職烈烈雋人翼翼王臣臣當
其官官當其人九一之政七賦以均

銘後漢蔡邕東海銘曰橋玄為司空公越在先民毗佐
天子罔不著其股肱畢其思心式率天行式昭德音

表宋謝莊東海王讓司空表曰臣側觀前載與窺洪典
三事之授惟帝其難臣乘少籍長久分踰涯量出滿入
泰每究榮光不悟乾燭方遠義路同遺下參弘化上尸

變理自非德仞具瞻聲堪民詠未有妄臻此澤空集茲
靈

齊孔稚珪為王敬則讓司空表曰故李通豪膽以親寵
登司王基才勇與聲華入選先帝擢臣以榮華陛下仲
臣以富貴遂得北帶五州東跨六郡內亞三鼎外齊四
嶽蟬佩之暎則左右交暉龜組之華則縱橫吐耀輕輪
徐動則劔戟如雲飛蓋暫停則歌鐘成列擬金龍吹簫
其前鳴笳鳳管疊其後鄧禹若不遭漢光則南陽之掾

吏微臣若不逢明聖則孤城之戍客豈可加以正台之
席登以論道之寄啓黃扉而變五緯躡青帷而調四序
梁劉孝儀為臨川王解司空表曰臣以庸薄謬竊隆重
職班三事任總六條衣袞坐槐既闕論道馳傳憇棠尤
慚為政而俯司土地仰變陰陽棟橈之譏已彰愆伏之
咎爰著今水沴乃作旱魃為災山無蒼蔚雲成煙火陞
下曲私未垂策免臣識是當逃責乞降茲台步協此天
人

梁江淹為齊高帝讓司空表曰臣聞日發星迴昊天無以喪其節山盈川冲厚地不能虧其度陛下停若鏡之明流如雲之暖方求士於版巖宜思賢如蜀肆

北齊邢子才為司空景讓表曰屬平分廣施造物多品長短入用小人見收連來台階堪均鼎足昨見謫見垂象災起潛伏此之為累非直微躬

碑後漢蔡邕司空袁逢碑曰凡所臨君明而先覺故能教不肅而化成政不嚴而事治其惠和也晏晏然其博

大也洋洋焉信可謂兼三才而該剛柔無射於人斯矣
銘曰天鑒有漢賜茲世輔顯允厥德昭胤休序我我雍
宮禮樂備舉穆穆天子孝敬允叙降拜屏著奉饋西序
威儀聿修化溢區宇乃尹京邑總齊禁旅又為司空房
楨碑銘曰公言非法度不出於口行非至公不萌于心
治身則伯夷之潔也儉嗇則季文之約也盡忠則史魚
之直也劉平則山甫之勵也總茲四德式是百辟風夜
匪懈以事一人枉絲髮樹私恩不為也討無禮當彊禦

弗避也是以功隆名顯在世孤特不獲愷悌寬厚之譽
享年垂老至于積世門無立車堂無宴客衣不變裁食
不兼味雖易之貞厲詩之羔羊無以加也明明在公寔
惟房后誕應正德式作漢輔邪慝是仇直亮是與剛則
不吐柔則不如媚茲天子以靖土宇

晉潘岳司空鄭衮碑曰陳謨台階翼和鼎實顯績成于
臺省清風暢于所莅故能老安少懷遠至邇親凡厥措
紳之士所以挹酌洪流含咀英芳者猶旱苗之仰膏雨

湛露之晞朝陽也銘曰於鑠元侯則天垂象弘操嶽峻
宇量深廣允恭克讓宣哲清朗有始有卒可大可久言
由忠信行履孝友光光金貂再冠其首赫赫皇符仍折
其部義格皇穹德冠羣后清風顯烈沒而不朽

晉孫綽庾司空冰碑曰君喻嵩巖之玄精挹清瀨之潔
流貞質謀於白珪明操勵於南金雖名器未及而任盡
臣道正身提衡銓括百揆知無不為謀必鮮過端委待
旦則有心宣孟以約訓儉則擬議李文君平恒無私已

謙寡欲當世之所難於君易之矣於是慨然遠鑒量已而退高挹帷幙投迹藩屏夫良玉以經焚不渝故其貞可貴竹柏以蒙霜保榮故見殊列樹治而不亂者有矣未有亂而彌治者也考終以證始即事以徵心少長能一其度貴賤不二其道文康之雅量於是乎弘著矣銘曰洋洋俊賴巖巖神嵩流淥淥氣頗扇祥風篤生公侯情靈德充臨川擬潔仰華思崇履險思夷處滿思冲方恢遠猷皇極是贊繁霜夏被脩梧摧幹人之云徂朝野

咸歎儀刑永戢光風長煥

梁劉孝綽司空安成康王碑銘曰昔者重華文命竝胃
高陽之苗豐邑舂陵俱纂帝堯之緒而虞夏草運姚姒
之姓已分高光再興大漢之名無改如我皇家梁齊代
建異文叔之紹開起自王族非伯禹之更姓公則本枝
別幹誕自河嶽五百之期實膺命世卜商有問是謂色
難承志望顏在公斯易至如文琰之對食餘幼權之言
爵里衛子之朗月映山杜生之凝脂點漆惟公具美歷

駕前修我馬非嶽陵之所至浩浩焉總江漢而為長
故能擊水三千搏風九萬排天闕而俯眊掩浮雲而上
征皇帝甄名挺聖河洛有徵握衡舍樞奄一時夏利建
藩屏固葉深根廊霍鄧郅方周啓祚封公為安成王食
邑二千戶允同衛叔賜寶器於商郊殊異唐侯戲桐珪
於汾水乃公為平西將軍荊州刺史楚之對齊屈完引
城池之固荆之比宋墨翟陳轅路之殊品金作貢不異
淮海珠璣犀象又無求於晉國況以雲夢九百之宏侈

章華三休之巨麗公禦煩以寡居高而降執冲虛之道
無矜滿之情其為政也莊敬足以範物慈惠足以庇民
剛毅足以威暴清貞足以勵俗天監十七年薨春秋四
十有五凡我庶民竊親高義况復祇承帝命來仕王家
兔園晚春叨從者之賜高唐暮天而奉作賦之私常懼
慶雲之惠不酬而搖落奄至豈謂經塵之効莫展而峻
極先顏思所以立言貞石貽厥長世銘曰昔在文韶五
賢二聖漢藩魏屏微風不競於赫我梁德符姬姓康王

康叔異時同盛爰自妙年令問不已一孝一悌寔先行
始義府文場詞人髦士波瀾莫際牆仞難窺用茲先覺
導此後知德大心小居高志卑再握不倦三吐忘疲飛
龍在天肇基宛瀆地猶小睇民同世復皇情睠正屬難
推轂允矣宗英移藩改牧誰謂路永江漢已浮彼蒼不
惠遽反成周川迴沂軸塗引歸旒

墓誌宋謝莊司空何尚之墓誌曰遠源長瀾自晉徂韓
潛川韜玉霍岫騰鸞處華民瞻出光帝難寂寞壽仁茫

昧報施調於飣歸經難褰寄晡映流芳煙煜作義

陳徐陵司空章昭達墓誌銘曰周原膺佳氣慈慈王
業攸興帝圖斯盛在昔光武佐命鄰縣者鄧侯高祖元
臣同郡者蕭相公台輔之量便著綺紈瑚璉之姿無待
雕琢起家為東宮直前所奉之君則梁簡文皇帝既而
黑山巨盜憑陵上國白水彊胡虔劉中夏公傾其產業
募是驍雄思報皇儲累殲鯨寇屬幽風有象代邸方降
搜荆楚之英才資班輸之妙略百樓忽起登雲霄而俯

臨萬弩俱張隨雷霆而並震揚兵於九天之上決勝於
千里之中殪彼羣兇皆無旋踵陳寶應至懷反叛客引
周迪資其食力更事窺窬公奉詔崇朝飲冰將力前茅
後勁步驟奔馳仍向甌閩殄其巢窟若夫鳴蛇之洞深
谷隱於蒼天飛猿之嶺喬樹參於雲日宜越艇而登嶠
蒙燕犀而涉江威武紛紜震山風海於是咸俘偽帥悉
據高墉爰泊滄溟莫不懋乂既而齊人無信將謀郢藩
闔艦戈船窺江淹漢公纔聞羽檄遽稟師期馳襲荊郢

應時燒蕩方欲宣威灑汧大討梁華屬上將之輜光逢
中台之掩曜大建三年薨於軍幕爾乃青烏拍墓白鵲
標墳林有逃車樹同華蓋前旌熊軾後乘龍輜介士發
三河之民哀銑同駟馬之曲長安傳坐恩禮盛於西京
襄陽墮淚悲慟喧於南峴

誅後漢張衡司空陳公誅曰敬仲初育發繇卜筮鳳飛
觀國流光末裔天祚明德德茂于公入孝出友爰肅爰
邑兼學多識窮理知幾德音孔昭翻爾灰飛賦政二城

還集皇闈公寔省之疊疊庶績公寔靜之藹藹百僚公
寔愍之乃陟司空纂禹之跡導揚徽庸致訓京畿協和
萬邦萬邦既協殊服來同眇論前績莫與比蹤

行狀梁任昉齊司空曲江公行狀曰公稟靈景宿擅氣
中和一匱初登東嶽之功可監埏埴在器瑚璉之姿先
表豈惟荆南有聖童之目襄城著孔甫之稱而已哉故
以羽儀宗家冠蓋後進路叔之一日千里北海之稱美
其治方斯茂如也志學之年偏治經紀登隆十載網羅

百氏藻斷贍逸蔚為詞宗延賈誼而升堂攜相如而入
室加以翰牘精辯發言有章持論從容辭無矜尚自河
洛丘墟厯載二百俾我逢掖遂淪左衽晉宋所以遺恨
祖宗是用顧懷公自荷方任志在尅復將欲使功遂之
日身退有所爰乃卜宇金陵縈帶林壑用辭聊城之賞以
為疏韓之館人謝運往遂輟遠圖

梁沈約齊司空柳世隆行狀曰公稟靈華嶽幼挺珪璋
清襟素履發乎韶年及長風質洞遠儀止祥華動容合

矩吐言被律時沈攸之狼據陝西氣陵物上而太祖登
庸作宰天厯在躬攸之播封豕之情總全荆之力兕甲
十萬鐵馬千羣水陸長驚志窺皇邑公抗威川渙勇略
紛紜顯晦有方出沒無緒攸之乃反旆亘圍親受矢石
增櫓乘埤嚴衝駕堆雲翱俯闕地穴斜通半藏晚淦負
戶晨汲公乃綏衆以武應敵以奇靈鋒電曜威策雲舉
事切三版之危氣損九天之就殘寇外老逆黨內離焚
舟委甲搆指宵遯公風標秀徹器範弘潤茂乎辭彩雅

善鼓琴摘純蔡之高芬纂鍾嵇之妙曲雖嬰拂世務而
素業無改臨姑蘇而想八桂登衡山而望九疑七紆邦
組三臨蕩甸五職瑞扇一司百揆固可以齊衡八凱方
駕五臣

儀同

東觀漢記曰鄧騭字昭明延平元年拜為車騎將軍儀
同三司儀同三司始自騭也

王隱晉書曰太始七年以鄭襄為司空天子臨軒遣使

就第拜授襄襄推讓上送印綬至于十數久之見許以
侯就第儀同三司置舍人官騎賜牀帳葦緝

齊職儀曰開府儀同三司秦漢無聞始建初三年馬防
為車騎將軍儀同三司事

魏以黃權為車騎開府此後甚衆將軍開府依大司馬
朱服光祿大夫開府依司徒卑服

墓誌簡文帝儀同徐勉墓誌銘曰朱弓表瑞寶劔攸歸
長瀾斯注瓜瓞合輝舉直斥偽校名責實朝有進賢野

無遺逸違天即地歸幽去冥空谷傳古哀風送旌

章齊王儉拜儀同三司章曰臣聞日中則是盈虛之定
分器滿必傾往復之恒理遂乃班同袞章變和台曜外
衆論道內總百司物議惟塵自識非據

梁庾肩吾為武陵王拜儀同章曰臣宅慶紫霄聯休皇
極地均指日既無跡而成高仕若乘風故不行而自遠
今者四郊無壘天下同文都尉春田猶居塞外單于冬
獵不入漁陽臣坐收三邊非勞士戰豈能屯兵大夏封

萬里之侯飛箭遼城受千金之壽論其才望有懼茂弘
先佩印校常羞叔度

表梁王筠為王儀同瑩初讓表曰執玉獻金卒先五等
親冕迎輶光導百辟坐階遠大遂致隆滿自位昇朝首
職冠禮闈辭滿之願將除致仕之請方奏而思渥恩皆
昭獎必被寵章爰降朝野驚矚是以安石歸禾固請元
規終以致讓況臣才質空疎器量庸淺而可以妄參鉉
席覲貌槐庭

梁沈約為始興王讓儀同表曰徒塵翠渥方降紫泥以
茲上令用隔下情況高擬萬石爰均八命室等天黃服
加黼黻出則高陪千乘入則仰司百揆陛下道苞九舜
明出十堯萬微必理一物興念有紆玄鏡暫垂止水

梁王僧孺為南平王讓儀同表曰臣聞石瓠難剖用謝
餅壘鹿木云庀事乖丹牖逢聖徽天一朝賞至非能聲
均河楚譽埒梁陳故以神夢紫霄心飛丹掖品同儀比
媿鉉莫殊

陳沈炯為周儀同失律後復官表曰日者駭驚鄭馬害
在晉軍獄囚悲其夜數縲人切其曉奏危光似燭察命
如絲云誰之尤自貽其咎假令誅以妻子戮及墳墓漢
非負德陵實孤恩况伏鑽俛眉遂受淮陰之間吞聲飲
恨不與臧洪共死陛下憐而宥之伊臣豈不獨愧喪其
子弟六謝父兄百萬之師干夫有長問臣安在誰曰董
司魂遊奉高不知何對

陳江總太保蕭公謝儀同表曰陂泉野戰曾無汗馬之

勞代邸運籌又闕前歌之勇薄伐事征早遊邊外執玉
奉酎又虧朝則王人降止朝冊遠臨奉述敕書曲停表
秦滄波阻夙既杜敬仲之辭閑路悠長致絕趙襄之讓
心馳紫路登文石而莫由目送白雲拜承明而未日

特進

漢雜事曰諸侯功德優盛朝廷所敬異者賜位特進在
三公下

百官表注曰特進官品第二漢制皇后之父率為此官

傳咸集曰特進執皮帛坐侍臣之下門下屬漢武特進
執壁已有舊制今特進宜執壁

齊職儀曰特進以功德特進見也


沈約宋書曰特進魏世驃騎將軍劉放衛將軍孫資等
遜位以侯就第蓋位特進其諸官加特進者從本官供
給特進但為班位而已不別有吏卒車服也

墓誌梁孝元帝特進蕭琛墓誌銘曰山東流水關西城
市義府辭鋒風飛雲起遊楚宦梁桂馥蘭芳蓮花可賦

迷迭成章學類五行書倅三篋已研金匱兼探玉牒石
詞既擬樂社茲同桃李成徑松柏為叢天地長久永扇
高風

陳江總特進光祿大夫徐陵墓誌銘曰耕耘書圃弋獵
文場藻思綺合尺牘繡揚辭奔太史筆利干將心緘武
庫口定雌黃奉使巡採絕域遐深市朝遷貿陵谷相侵
形寄玉績多宣攀附高排閭闔鬱轉雲路年踰致仕齒
及懸車夜漏方盡馳光復斜平原出宿庠序為家隴愁

宿霧松悲聞鳥地迴雲低山重樹小九原孤月三泉送
旄疇曩行役共上河梁余因病免君事遠將痛心期之
祖謝憫時代之銷亡冀鐫石於玄冢留清風於故鄉



藝文類聚卷四十七

欽定四庫全書

子部

藝文類聚卷四十八

詳校官中書_臣李彤

貢外郎_臣牛稔文覆勘

總校官知縣_臣楊懋珩

校對官助教_臣胡予襄

膳錄監生_臣李培

欽定四庫全書

藝文類聚卷四十八

唐 歐陽詢 撰

職官部四

錄尚書

尚書令

僕射

吏部尚書

尚書

吏部郎

侍中

黃門侍郎

散騎常侍

給事中

中書令

中書侍郎

驃騎將軍

錄尚書

應劭漢官儀曰章帝詔曰司空牟融典職六年勤勞
不怠其以融為太尉錄尚書又曰和帝策書曰故太

尉鄧彪元公之族三讓彌高海內歸仁為羣賢首其以彪為太尉錄尚書事百官總已以聽又曰殤帝策書曰司徒徐防以臺閣機密施政牧守其以防為太尉錄尚書事百官總已以聽又曰冲帝策書曰太尉趙峻二世常典機衡有匪石不貳之心大司農李固公族之苗忠直不回今以峻為太傅固太尉叅錄尚書事又曰靈帝策書曰故太尉陳蕃忠亮蹇諤有不吐茹之節司徒胡廣惇德允元五世從政今以蕃為太傅與廣叅錄尚書

事

王隱晉書曰賈充為太尉錄尚書五年伐吳為大都督
吳平上遣侍中程咸犒勞增邑八千戶

晉中興書曰明帝后庾氏為皇太后九月癸丑皇太后
臨朝制司徒王導錄尚書事

沈約宋書曰高祖永初三年尚書令揚州刺史徐羨之
為司空錄尚書事又曰孝武帝即位以大將軍江夏王
義恭為太尉錄尚書事又曰諸公錄尚書事古制也王

肅解尚書納于大麓曰堯納舜於尊顯之官使大錄萬機之政案漢氏諸吏平尚書奏事後霍光以大司馬大將軍平尚書事

傳暢故事曰何劭王戎張華裴楷楊濟和嶠為愍懷太傅通省尚書事張華為光祿大夫尚書七條事皆諮而後行惠帝之世太保衛瓘太宰河間王顥太傅東海王越皆錄三省尚書祕書事

表齊謝朓為明帝拜錄尚書表曰升降玉階對揚休命

六轡在手千里何偕司會天官之統尚書百僚之本弘
之即庶績惟凝替之則曷倫斯敦修身踐言本慙五美
果行育德未階六正妄屬負圖之寄多謝五仁之績操
檄檄於龍津荷梓梁於雲構無以輔位明堂遺象麟閣
啟陳徐陵安成王讓錄尚書表後啟曰臣聞間平就國
乃盛漢之常儀廊霍無官實宗周之明典何則皇季之
重非待歷階王爵之隆自高羣辟况臣戢翼要荒亟離
寒暑進慙趙勝能定楚從退匪齊文馳免秦厄固以內

切皇心外貽家恥甘輸重餌降禮單于迺城十五如諸
和壁市鄉三十聊同寶劍武夫力而獲諸原微臣還而
反諸敵瞻言馬駿著隴右之功追念曹彰克烏丸之虜
前王子弟若此勲庸偏其反而豈可勝愧

尚書令

漢書曰張安世字子孺少以父任為郎因善書令給事
尚書精力於職休沐未嘗出行幸河東亡書三篋詔問
莫能知唯安世識之具作其事後購求得書以相校無

所遺失上奇其才擢尚書令

漢雜事曰尚書黃香為東郡太守乞留宿衛拜為尚書
令秩二千石

漢官儀職曰尚書令主贊奏摠典綱紀無所統秩二千
石

東觀漢記曰侯霸為尚書令深見任用樊準為尚書令
明習漢家舊事周密畏慎申屠剛為尚書令蹇蹇多直
言無所屈撓又曰永平七年宋均徵為尚書令忠正直

言數納策謀每駁議未嘗不合上意

張璠漢書曰左雄為尚書令限年四十先試經然後舉
孝廉

續漢書曰陳蕃出為豫章太守性方峻不接賓客徵為
尚書令送者不出郭門

百官表曰尚書令是謂文章天府銅印墨綬五時朝服
納言幘進賢兩梁冠佩水蒼玉揔攝諸曹出納王命敷
奏萬機書曰龍命汝納言夙夜出納朕命惟允詩云惟

仲山甫王之喉舌蓋此謂也

魏志曰明帝即位進陳矯為尚書令車駕常卒至尚書門矯跪問帝曰陛下何之帝曰欲案行文書耳矯曰此自臣職分非陛下所宜臨也若臣不稱其職則請就黜退陛下宜還帝慙迴車而返又曰太祖進荀彧為漢侍中守尚書令又曰裴潛為尚書令奏正分職簡名實出事使斷官府者百五十餘條

費禕別傳曰禕代蔣琬為尚書令以朝晡聽事其間接

納賓客加之博奕不廢後董允代之旬日之間事多俱
積允曰人之才力相懸若此

曹羲九品議曰尚書尊官也親作納言易曰樞機之發
榮辱之主

漢和帝南陽左雄為尚書令天下皆慎選舉選舉所知
自其職也

山濤啟事曰尚書令李膺遷處缺宜得其人征南將軍
羊祜體儀玉立可以肅整朝廷

王隱晉書曰樂廣為尚書令所在無當時之功譽然為
後人所思又曰咸寧二年李膺為尚書令雖歷職內外
而在公退食家室至貧儉兒病無以市藥上賜錢十萬
齊職儀曰秦漢之世委政公卿尚書之職掌於封奏令
贊文書僕射主開閉令不在則僕射奏下其事魏主重
內職八座尚書任同六卿舜舉八元八凱以隆唐朝令
號八座為元凱謂曰賢能用事義如昔也

箴晉摯虞尚書令箴曰舜納大麓七政以齊內成外平

風雨不迷補我袞闕闡我王繇王繇允塞四海咸休雖
聖雖明必賴良才無曰我智官不能任發言如絲其出
成綸千里之應樞機在身

碑後漢潘勗尚書令荀彧碑曰夫其為德也則主忠履
信孝友溫惠高亮以固其中柔嘉以宣其外廉慎以為
己任仁恕以察人物踐行則無轍跡出言則無辭費納
規無敬辱之心機情有密靜之性若乃奉身蹈道勤禮
貴德後之事間匪云予克然後教以黃中之獻守以貞

固之直注焉若洪河之源不可竭也確焉若華嶽之停
不可拔也故能言之斯立行之斯成身匪隆污直哉惟
清紊網用亂廢禮復經於是百揆時序王猷允塞告厥
成功用俟萬歲

表後魏溫子升臨淮王或謝封開府尚書令表曰臣道
愧山東氣慙隴右激水弗功搏風無力但以平原帶地
資緒極天發趾自高理翮以遠出臨侯服既乏刺舉之
能入踐帝閭又無應對之美空復受弋清廟推轂朱門

孝闕淚河功慚汗海大寶遠隆橫草未樹顧以有涯願
言知止又為魏南陽王允寶拒讓尚書令表曰臣聞立
而託乘乃成致遠之功坐以運舟遂有利涉之用若以
輕任重課憑虛責實雖欲自勤終焉靡效

梁范雲為柳司空讓尚書令初表曰陛下繼明南面復
垂顯錄增榮益觀豈側身限而露不廣海塵不增山微
物知止敢忘自退誠以懷音感遇久妨彛序尸祿昧寵
取蹈風歌中寐軫心方食凝慮寧可冒釐綜之重負學

製之談將玷朝徽匪伊身議第二表曰臣聞聖人在上
愚智無以息隱天下有道方圓歸其能是如以駕蹇之
才不致問于千里瓦礫之質佇待價於十城伏願陛下
矜臣負乘之尤照臣匪飾之情迹言觀用允授上才敘
會流恩曲蠲下第則雲序斯平曩章載穆

梁沈約拜尚書令到都上表曰竊位之譏允當斯責王
命私請有事相傾油雲湛露徒降旻昊之德弱縞輕蟬
不載邱嶽之重登階望席悅焉失步

北齊邢子才為文襄皇帝讓尚書令表曰揚職萬機摠
任百揆想銜庶物準納羣僚何以助日月之光華增天
地之高厚反鑒取照匹此何難倒裳求領方之為易又
表曰正以晝覽太山不假秋毫之察夜仰列宿豈藉燭
龍之明爵人以世既非盛德之舉公門有私故是陵夷
之運

陳江總讓尚書令表曰臣弱歲立朝本無奇志每謂任
登常伯足承基緒值梁季不造牧拙人間東竄三江南

徂百越不知秦漢十有七年心跡退黜平生畢矣但性
疎懶不屑死增俯仰乖時人物多忤天飛踐祚寄隆重
謬以商邱之木遂比舟楫之材燕岱之石混同瑚璉之
器當由崇賢使舉早守名節竊以天府文昌萬方之數
天官冢宰無所不統禮革三獨事昭百揆曠職云久三
十餘載一旦開置必資望實豈期廷典私偏濫庸菲薄
陛下聽覽餘辰曲垂昭納遂斯反汗高選具瞻則敝蓋
敝帷使暮齒歲制月制賒臣皓髮不以一怠

啟陳江揔除尚書令謝臺啓曰竊以昔之冢司今日端揆頃同台袞無人則闕陛下將守安可叨賁謹當奏承夜月異奉三思之旨聲寄浮雲方祈九天之路又除尚書令斷表後啓曰司會治本冢宰朝端搢紳所屬儀刑攸在皇代以來無人則闕陛下將備厥職用穆臣僚不容始自庸菲以謹物議當今藩翰至戚不無其才廊廟重臣亦有其器伏願檢俞往之則闡平章之道公心布欸有理存焉

僕射

漢書曰僕射秦官也古者重武官有主射以督課之自侍中尚書博士及駙宰武職官人皆有取其領事之號又曰鄭崇哀帝時擢為尚書僕射數求見諫諍上初納用之每聞曳革履上歎曰我識鄭尚書履聲

續漢書曰尚書僕射一人六百石令不在則奏下衆事百官表注曰僕射一人銅印墨綬五時朝納言幘進賢兩梁冠佩水蒼玉建安以贈執金吾榮劭為尚書左僕

射僕射之有左右自此始也

鍾離意別傳曰意為尚書僕射其年匈奴羌胡歸義詔賜縑三百匹尚書侍郎廣陵暨鄴誤以為三千匹詔大怒鞭鄴欲死意入諫曰海內遐邇謂陛下貴微財而賤人命愚臣所不安明帝以意諫且鄴錯合大義貫鄴勅大官賜酒樂詔謂意曰非鍾離尚書朕幾降威於此郎魏志曰桓範薦徐宣為僕射車駕幸許宣摠留事帝還主者奏呈文書詔曰吾省與僕射何異竟不視又曰陳

泰為尚書左僕射典選舉

晉諸公贊曰司馬珪時多令望早歷顯職晉受禪為尚書左僕射時年三十七衆論以為美

晉公卿禮秩曰司馬珪三十七為尚書僕射魏晉以來或置左右或不置

世說曰周顗字伯仁過江積年恒大飲酒嘗經三日醒時論謂之三日僕射

王隱晉書曰太康元年以山濤清虛恬簡轉為僕射

齊職儀曰魏朝以尚書僕射毛玠領選曹

晉武以僕射山濤領吏曹後依擬至今或領焉

沈約宋書曰劉延孫為尚書左僕射延孫疾病不任拜
起上使乘船自清溪至平昌門入尚書下舍

墓誌梁沈約尚書右僕射范雲墓誌銘曰合契興王匪
勞物色乘風鬱起化成龍翼乃作喉唇帝猷必舉乃作
銓衡彛倫有序北京祖峻東川迴溥蘊吾名臣終天靡
作

表宋傅亮讓尚書僕射表曰自皇基肇創豫班策勛纖
善微績未聞朝野百揆治樞揔貳殷要誠非庸臣所宜
叨擬臣聞權衡既懸錙銖靡遁厲駕習驥終莫之近敗
駕傷錦備之前誥必將上增國垢下招私黷

齊王儉讓左僕射表曰待臣於常均之外眄臣於代僚
之右親乖具章乘非其器霸府方隆超居元佐國朝草
昧叅贊百揆

梁沈約讓僕射表曰臣聞役壯休老上典所優晨行暮

息事身恒分若夫玄黃未已非狄駕之衛筋力為用豈
強飯之時養老杖鄉抑推前典服戎告謝親學匪任宿
肉極其虛憊歲制防其不辜寔所以蠲假衰疾收屏淪
暮

梁張纘讓尚書僕射表曰加以矯心飾貌酷非所閑不
喜俗人與之共事雖復吐言如傷屈體無骨動容竊斧
猶成多憾曾聞如闕坐客恒滿情態叅差世塗盈虛意
以興謗舍塵見猜疑似雖分聖賢致感人之包藏山川

非險況在於臣焉可證綜

陳徐陵讓左僕射初表曰臣聞七十三歲揚雄擬經六
十三年平津對策若斯強壯無歎耆老臣勵則胄華軒
冕才允卿相出納流譽朝野具瞻臣弘正國老儒宗情
尚虛簡玄風勝業獨王當年臣種氣懷沈密文史優裕
東南貴秀朝廷親賢並見壯猷皆宜左執若漢武好少
則微臣已老若周文愛老則有此羣才伏願天明更謀
梓匠求其妙選稱是能官又讓右僕射初表曰加以言

尋盟好仍屬亂惟丁零盜其牛馬烏孫竊其印綬子卿
茹雪叔向為國雖獲東歸備離此厄昔李廣遺恨不值
漢初甯戚自歸悲逢堯換臣隨望聖運實在權輿時參
決勝之籌頗奏發兵之議當塗錫舍非無董昭之誠典
午禪文不降張華之實

陳江揔讓尚書僕射表曰藻鏡官方品裁人物門驚如
市不慚屋漏心抱如冰無欺暗室但屢淹星鳥每知忝
素世網拘束事歸僂勉今此召會尤增據蒞竊以端揆

副職官稱師長革履升降傳呼寵赫儀刑朝首冠冕纓
綸兼復戶摠衡流匡佐繁俗安膺重責必踐危機

吏部尚書

魏志曰盧毓為侍中在職三年多所駁易詔曰官人秩
才聖帝所難必須良佐進可替否侍中毓稟性貞固心
平體正可謂明試有功不懈于位者也其以毓為吏部
尚書使毓自選代曰得如卿者乃可毓舉常侍鄭冲帝
曰文和吾自知之更舉吾所未知者乃舉阮武孫邕帝

於是用邕

袁子曰魏家置吏部尚書專選天下百官夫用人人君之所司不可以假人者也使治亂制在一人之手權重而人才難得居此職稱此才者未有一也

王隱晉書曰山濤為太常遭母喪手植松柏詔曰今風俗凌遲豈宜鎮以退讓山太常雖在諒陰古人亦墨經從戎其以濤為吏部尚書濤用人皆先密啓然後公奏又曰鄧攸遷吏部尚書牧馬於家庭妻自素食不受一

飯於人

世說曰王濬冲裴叔則二人總角詣鍾士季須臾去後客問向二童是誰曰裴王客曰何如鍾曰裴楷清通王戎簡要後二十年此賢當為吏部尚書異爾時天下無復滯才

語林曰袁真為監軍范去平作吏部尚書大坐語袁卿此段還不失護軍袁曰卿何事人中作市井

百官表注曰吏部尚書一人秩六百石掌選舉齋祠

晉諸公贊曰李胤為吏部尚書正身率職不撓故能行其所見遂刊定選例而著于令

沈約宋書曰蔡廓為吏部尚書廓因傅隆問傅亮選事若悉以見付不論不然不能拜亮以語錄尚書徐羨之曰黃門以下悉以委蔡自此上宜共衆同異廓曰我不能徐干木署紙尾遂不拜干木羨之小字也選案錄尚書與吏部尚書連名故廓云紙尾又曰江湛為吏部尚書家甚貧約不營求利餉饋盈門一無所受無兼衣餘

食常為上所召值澣衣稱疾經日衣成後起又曰顏竣
為吏部尚書留心選舉自強不息任遇既隆奏無不可
謝莊代竣意多不行竣容貌嚴毅莊風姿甚美賓客喧
訴常懼笑答之時人語曰顏竣嗔而與人官謝莊笑而
不與人官

箴晉傅玄吏部尚書箴曰明明王軌制為九秩君執常
道臣有定職各有攸司非用不隱昔舜舉皋陶而俊乂
在官夔龍出入朕命周仲山甫亦允納言

誅齊邱遲侍中吏部尚書何府君誄曰遠量夷雅淹姿
英茂進德方新循名以舊分鑣先達爭驅俊秀匪直羽
儀實惟領袖知人斯哲在帝之難僉謂往諧是謂能官
園阿望幣釣嶼投竿金張之貴允茲七侍有美一人柔
貂三珥服冕乘軒鳴玉飛翠不貪為寶貴而能貧唯靜
是悅惟寂是珍履信茲從積善方慶如何斯德曾是知
命彼高者天與人焉咏眇望周行式瞻林壑灑沃紛埃
擯揚流俗言必玄遠神唯珠玉色恬喜愠心豈榮辱

宋謝莊讓吏部尚書表曰招才琴釣之上取士歌牧之中終能克夷景命榮懷萬宇豈容先私首曲近有經過且不習冠制趙客興鑒未閒統馭鄭臣有規匪侮身譏後魏溫子升廣陵王讓吏部尚書表曰假勢風雲非由羽翮徒得推遷就列僂俛當官曾無辟雍議禮之名詎有銅爵獻賦之敏而政本寔繁司會尤切抑揚智地用捨時流實當年之準的乃一世之權衡得其人則分職之任隆非其才則曠官之失起

梁任昉為范雲讓散騎常侍吏部尚書霄城侯表曰夫
銓衡務重闕治隆替遠惟則哲在帝猶輕漢魏以降遠
識經軌雅俗所歸唯稱許郭齊季凌遲官方淆亂草創
惟始議存改作恭己南面責成斯在豈宜妄加寵私以
乏王事附蟬之飾空成寵章求之公私授受交失近世
侯者功緒參差或足食闕中或成軍河內或盛德如卓
茂或師道如桓榮四姓傳祠已無定紀五侯外戚且非
舊章而臣之所附唯在恩澤且去歲冬初國學之老博

士耳今茲首夏將亞冢司雖千秋之一日九遷荀爽之
十旬遠至方之微臣未為速達

梁沈約為褚炫讓吏部尚書表曰竊惟玄素未辨必謬
朱紫之察規矩或昧理喪方圓之功東西兩漢左雄孤
絕於前南北二晉山濤莫嗣於後良由性藏於貌才隱
乎心楚越無以況其迴殊山川未足方其險阻雖復拂
暗為明免過生智亦何以登奇拔異離渭分涇

梁張纘讓吏部尚書表曰漢革民曹魏仍東掾毛孝先

以清公見美廬子家以貞固任職降及晉代希覩其人
樂彥輔雍容自守當時恨其寡譽山巨源意存賞拔不
免與世浮沉鄧攸牧馬家庭何益止競之操下壺如含
瓦石未聞撿裁之功

梁王筠為第六叔讓重除吏部尚書表曰臣聞剝犀截
鴈必俟昆吾之鋒逐日追風信資伯樂之駿未有驟駕
蹇足而方騁遙塗採藝鋤刀而求其斷割伏惟則哲為
體事艱歷代明別攸奇義重前王必使玉石薰蕕區別

靡雜涇渭玄黃條流不與自非伯豪之天下稱公仲子
之時人歸德孝先之拔真抑偽巨源之黜惡舉善然後
可以銓鏡流品平均衡石

陳江摠讓吏部尚書表曰竊以漢置五曹方今六尚魏
隆八凱擬古六卿近喻喉舌遠膺樞斗至如東京西晉
裴王仰首伸眉可得論列此矣但臣門基世緒晉宋以
來內侍帷扆入尸衡尺或年甫將立或歲未強仕是以
退思弱冠追傷疇昔早塵華任見知名輩常謂忝竊匪

朝伊夕豈期梁室多故有志無時平生意氣颯爾零落
特由邀奉嘉運千載一時惟奮寵靈遂臻於此又為沈
尚書君理讓右僕射領吏部表曰辛香以來安石以後
遵其軌躅必大廈之棟梁揔其寄任亦巨川之舟楫未
有綿力薄材輕膺此舉

尚書

應劭漢官儀曰尚書唐虞官也書曰龍命汝作納言朕
命惟允

漢明帝詔曰尚書蓋古之納言出納朕命機事不密則害成可不慎歟

韋昭辯釋名曰尚上也言最在上揔領之也辯云尚猶奉也百官言事當省案平處奉之故曰尚尚食尚方亦然

漢書百官表曰成帝罷中書官初置尚書員五人如淳曰主天子文書曰尚書如主壻曰尚主

桓子新論曰堯官舜於大麓者錄天下事如今之尚書

官矣宜得大賢智乃使處議持平焉

謝承後漢書曰朱穆為尚書讜言正直

華嶠漢書曰韋彪上疏曰欲急民所務當先除其患其原在尚書典樞機天下事一決之不可不察

東觀漢記曰章帝東巡過任城乃幸鄭均舍敕賜尚書祿以終其身故時人號為白衣尚書

續漢書曰李固上疏曰陛下之有尚書猶天之有北斗北斗為天喉舌尚書為陛下喉舌

魏志曰陳羣為尚書制九品為官人之法羣所建也

王昶考課事曰尚書侍中考課一曰掌建六材以考官人二曰綜理萬機以考庶績三曰進視惟允以掌讜言四曰出納王命以考賦政五曰罰法以考典刑

會稽典錄曰鄭弘拜尚書郎舊典科滿補縣長令史為丞尉弘奏以為臺職位尊而賞薄人無樂者諸使郎補縣令令史為長上從其議自此為始

齊職儀曰尚書六人品第三秩六百石進賢兩梁冠納

言幘絳朝服佩水蒼玉執笏負荷

沈約宋書曰顧琛傳曰寺門有制八座以下門生隨入者有差不得雜以人士琛以宗人顧碩頭寄尚書張茂度門名而與碩頭同席坐遣出凡尚書官大罪則免小罪則遣出出者百日無代人聽還本職

箴漢揚雄尚書箴曰允勅百工命作齋慄龍惟納言是機是密出入王命王之喉舌獻善宣美而讒說是折我視云明我聽云聰載夙載夜惟允惟恭故君子在室出

言如風

誅晉潘岳庾尚書誄曰寬而能懷威而不猛化行如形
民應如影瞻瞻虛坐翩翩玄幕几筵生塵空館寥廓
晉盧湛尚書武強侯盧府君誄曰湛罪重五嶽繫深四
海身不灰滅延于家門方今斬焉在疾死已無日大懼
先意遺烈將墜乎地罔極之哀終不宣寫是以忍在草
土之中撰述平素之迹篤生我君天挺賢俊弘闡大風
光隆洪胤蔚矣其姿綽乎其韻天不予晉厄運時臻陽

九之會雖聖莫振君實振惶國難是圖跋履山川東征
西徂方協遐任言復皇輿不見楚申致命郢都往古來
今自遠及近凡在喪親猶思俱殞况我荼毒靡經不盡
日月逾邁寒暑代遷恩慈彌遠窮思日纏撰述遺跡臨
文煩寃

陳江揔度支尚書陸君誄曰陸公國士之眷惠好之深
臨喪能誄久願揺筆時事迤邐不惶削藁梁季適越未
戢止戈陳世入仕累牽物役杼柚於懷三十餘載隋開

皇九年於長安致仕懸車以洎就木何幾但東海成田
南冠承繫龜山更徙空想吹笛之哀馬角徒生絕望通
波之水嗚呼哀哉於是攬涕操觚乃為誄曰鴈行攸序
龍作間才讓珠不拜錫劒恩來世故天禍臣悲主辱露
盡朝陽風驚夜燭悠悠世路辛苦艱虞尋戈滿道曝骨
交衢家無半菽地絕飛芻念羣桑梓零落彫枯傷君井
邑了盤崎嶇淒涼故友擗樹遺孤臨穴別野撫觀長塗
梁張纘故左民尚書忠子沈憎旻墓誌銘曰漸東振古

龜組三襲政若解繩吏如燥濕十升龍管四至九卿居
高首映比德魯明

表梁沈約讓五兵尚書表曰臣聞百舍之趙非宿春所
資千里之越豈一葦能泝何者裝輕適于路遠舟弱疲
於濟深醜貌悴容不藉鑒於淄水駕足蹇步終取躓於
鹽車

梁邱遲為范尚書拜表曰昔滕公移晷於泗亭陳遂留
懼於博進祿止一守官窮九列臣獲照秋陽取沃淮海

發蒙去羆已若松喬匪富伊榮須臾至此賞叅十亂躬
越五兵歷覽前載孰與為匹

梁蕭子範為兄宗正讓都官尚書表曰納言之授皇命
所由五星懸曜差池紫宮之曲百官根本聯曹建禮之
內孔蔡詣博垂芳於兩京陳鍾令才比肩於魏世遯望
前英俯修薄義無尸素禮而絕祗奉

陳徐陵讓五兵尚書表曰臣聞仲尼大聖猶云書不盡
言士衡高才嘗稱文不逮意臣比衰疴自積思緒茫然

頻託朋遊為裁章表雖復陳琳健筆未盡愚懷孫惠辭
人頗加煩飾所以高天緬邈弗降昭回瞻拜絛綸更增憂
億臣雖不敏弱冠登朝伊昔承華豫遊多士晚逢興運
爰濫寵私爾時四郊多壘七雄分爭國家制度日不暇
給趙宮論受命之宜隨邑奏升壇之禮而叅聞秘計弗
解單于之兵飛箭馳書未動聊城之將不期枚乘老叟
忽降時恩馮唐暮年見申明主擢宰京邑朝坐棘林遂
致洛陽無雨非比長安多盜其宜屏錮用寘嚴科猶處

名僚久為叨竊但著書天祿雖如劉向朔望登朝轉同
王隱於其朽劣尚可從容司會文昌邈然非據

吏部郎

郭子曰許允妻阮德如妹允為吏部郎多用其鄉里帝
遣虎賁收允婦出閣戒允曰明主可以理奪難以情求
允至明帝核之允答曰舉爾所知臣之鄉人臣所知也
願陛下檢校為稱職與不若不稱臣宜受其罪既檢校
皆其人於是乃釋允舊服敗壞詔賜新衣初被收舉家

號哭允新婦自云無憂尋還作粟粥待之須臾允至
魏志曰諸葛誕為吏部郎有屬託則顯其言而承用之
後有當否則云議其得失自是羣僚莫不愼其所舉
山濤啟事曰人才既自難知中人以下情偽又難吏部
郎與辟事日夜相接非但當正己乃當正人

王隱晉書曰李膺為吏部郎精慎選舉號為廉平

山濤為吏部郎文帝與書曰足下在事清明潔操邁時
念多所乏今致錢二十萬緡百斛穀二百斛又曰王戎

名位清貴二十四為吏部郎

晉中興書曰畢卓字茂世新蔡人少亦放達泰興末為吏部郎常飲酒廢職比舍郎釀熟卓因醉夜至其甕間取酒飲掌酒者不察執而縛之郎往視之乃畢吏部也遽釋其縛卓遂引主人宴於瓮側取醉而去卓嘗謂人曰右手持酒卮左手持蟹螯拍浮酒船中便足了一生又曰阮放與從弟孚齊名在銓管之任甚有稱譽性清儉終不治產業為吏部郎不免饑乏王導庾亮以其名

士給衣食放由是得立

王蘊別傳曰蘊字叔仁為吏部郎欲使時無屈滯曾下鼓急出日昃乃至家去臺數里高褰車帷先後與語不得進也一官缺者求者十輩蘊連狀呈宰錄曰某人有地某人有才不得者甘心無怨

世說曰吏部缺文帝問其人於鍾會會曰裴楷清通王戎簡要皆其選也於是用裴又曰山公舉阮咸為吏部郎曰情真寡欲萬物不能移也

沈約宋書曰王微字景玄吏部尚書江湛舉微為吏部郎微與湛書曰君平云生我名者殺我身天爵猶減名安用吏部郎哉其舉可陋其事不經非獨搢紳者不道僕妾皆笑之

表梁陸倕拜吏部郎曰銓衡庶品歷選賓僚阮盛真素屢薦未登陸亮忠心裁居拜職自非季重清識字文恬正可以區分管庫式鑒胥吏

梁王僧孺吏部郎表曰臣生輕飛籜品細疏壤寂寞州

閤取淪室實不自求於善管寧許人以能官從班隨牒
自安踈遠豈望翰飛終知跡滯一逢浸漉幾聞昭晉假
拙為心變奇成偶寧為天覆地長復與雨露相滋秋成
春發必如暄寒無爽自變况塗多超嵩鄧屢考固其比
越在累誠於可聞方愧朱紫永惜鈞衡固惟許李終非
王畢取其清尚同所經企求之碎密寧可庶幾

梁任昉吏部郎表曰郎官之重千金非譬爰在前世實
光選造清通為首終遂弗居深識為度累薦無獲承乏

攝官顧知其望方今皇明御宇昇長咸亨涇渭摺紳無
謬衡石抑揚庶品亦自能官顧已循涯孰用祇荷唯知
死所未識所報

梁陸倕遷吏部郎啓曰臣器均濩落材同擁腫效非積
山勤垂附地自叨榮秩列裁移氣序而坐延曲私遂被
洪造自非割蚌識珠覩石知玉寧可以獲名理俗見操
敦教

梁王僧孺除吏部郎啓曰自一遇休明多逢渥澤出斯

溝壤置之霄漢清塗華轍叨厠累仍顯職名階俄來修
至而智効必其無取尤怠忽焉已彰不意涵養更滋霧
需愈此始職樞華紛體相選知非腴族必待俊民何言
賤劣所或叨假循涯測限生所不勝瞻恩奉德死何能
報

侍中

環濟要畧曰侍中古官也或曰風后為黃帝侍中周時
號常伯者言其道德可常遵也

秦始皇復古冠貂蟬漢因而不改此內官侍帷幄受顧問拾遺於左右出則負璽以從秩二千石

漢舊儀曰侍中無員或列侯將軍衛尉光祿大夫為侍郎得舉非法又曰侍中左右近臣見皇后如見帝見婕妤好行則對壁坐則伏茵也

應劭漢官儀曰侍中周官也金蟬左貂金取堅剛百鍊不耗蟬居高食潔目在掖下貂內勁悍而外溫潤侍中便繁左右與帝升降卒思近對拾遺補闕百僚之中莫密

於茲秦始皇破趙得其冠以賜侍中

漢書曰桑弘羊雒陽賈人子以心計年十二為侍中又曰霍去病以皇后姊子年十八為侍中善騎射又曰留侯子張辟疆為侍中年十五又曰孝惠帝時侍中皆冠駿驥貝帶傅脂粉又曰張安世子孫自宣元以來為侍中又曰元帝以史丹為侍中出則陪乘又曰侍中金敞與劉更生拾遺左右蕭望之周堪四人同心輔政又曰衛尉金敞病甚成帝拜子涉為侍中使綠車載送衛尉

府

載以皇孫
車寵之

三輔故事曰金日磾忠勤守節七世為侍中

魏志曰蘇則拜侍中與董昭同僚昭常枕則膝臥則推之曰蘇則之膝非佞人之枕又曰陳羣為侍中領丞相東西曹掾

華陽國志曰譙隆為上林令武帝欲廣上林苑隆言堯舜至治廣德不務林苑帝後思其言徵為侍中

益部耆舊傳曰蜀郡張寬漢武帝時為侍中從祀甘泉

至渭橋有女子浴於渭水乳長七尺上怪其異遣問之
女曰帝後第七車知我所來時寬在第七車對曰天星
主祭祀者齋戒不嚴則女子見

文士傳曰張衡拜侍中恒居帷幄儀容諷議拾遺左右
摯虞決疑要注曰漢末喪亂絕無玉佩侍中王粲識舊
珮始復作之今日玉珮受法自於王粲也

王隱晉書曰韋誕以能書留補侍中魏氏寶器銘題皆
誕書也

七賢傳曰山濤太始七年為侍中詔書曰濤清風惇履
思心通遠宜侍帷幄盡規左右

顏含別傳曰顏髡字君道儀狀嚴整風貌端美大司馬
桓公歎曰廊廟之望喉舌機要

續搜神記曰程咸字延休其母始懷咸老公授藥與之
服此當生貴子晉武帝時歷位至侍中有名於世

語林曰晉孝武好與虞嘯父飲酒不醉不出後臨出拜
殆不復起帝因呼人扶上殿虞侍中嘯父答曰臣位未

及扶醉未及亂非分之賜所不敢當帝美之勅左右疏其語

相書占氣雜要曰氣如連珠入闕門為侍中

沈約宋書曰陸仲元者晉太尉玩曾孫也為侍中吳郡太守自玩至仲元四世為侍中時人方之金張二族又曰殷景仁遷侍中與王華王曇首劉湛四人並時為侍中皆以風力局幹冠冕一時同升之美近代莫及又曰王僧綽遷為侍中任以機密時年二十九始興王濬嘗

問其年僧綽自嫌早達逡巡良久乃答其謙虛自退若此

碑晉裴希聲侍中嵇侯碑曰夫君親之重非名教之謂也愛敬出於自然而忠孝之道畢矣樸散真離背生狗利禮法之興於斯為薄悲夫晉弋陽子嵇紹字延祖資乾剛之純粹體中和之淑虛少有清劭之風長懷弘仁之度加以通朗淹濟靡才不經學為儒宗庶績光被弱冠登朝則敷文秘閣晚節強仕則納言樞極太安之初

權臣擅命皇輿親征次於蕩陰六軍奔攻兵交御輦紹
儼然端冕正色以扞鋒刃遂殞命于御側忠誠感人神
義聲振四海銘曰二儀肇建君臣攸序我我侍中應期
作輔外播仁風內舉心膂執慈弗勇靡仁不武見危授
命背生殉主確乎其操邈乎其崇矯矯王臣憲慈遺風
在親成孝於敬成忠

宋傅亮侍中王公碑曰體亞黃中道及微管元勲盛德
光于晉載于時運距無妄陵夷有漸至于兵纏象魏壘

結四郊公以民望晉朝居疑間之際懷方履順處艱以
貞顛沛不能迴其操彊禦無以蕩其守鑠矣公侯乘和
挺生識深冬潭文艷春榮爰初素履好是冲默亦既端
委振風育德

墓誌宋孝武故侍中司徒建平王宏墓誌曰含榮幼耀
膺和早慧徘徊天人優遊經藝鴻沴纔流皇根中絕體
孝盡性懷追孝烈反我宸居毀網更結管機凝務端朝
贊契召輝才融士頽風折秘路長陰昭塗永滅

梁元帝侍中新渝侯墓誌銘曰爰始降神誕茲初載方
琮有燭圓珠無類義若聯環文同藻繪三分竹使再徙
建旗朱帷自舉白鹿隨車武實威邊文能懷遠乍歌去
速時謠來晚昔我往矣千駟連輶今茲旋旆雙鴈隨舟
山迴素旄水導丹旒寂寥原野搖落徂秋又侍中吳平
光侯墓誌曰惟嶽降神表山甫之德敬如君所顯成季
之徵潔靜精微岐嶷天挺學兼義府談均理窟歷太子
洗馬八人掌藉為崇賢之領袖五日來朝冠承華之楷

模遷豫章內史法井鸞峯甘露歲下蕭崖鶴嶺連理成
陰徵為太子左衛率遘疾薨于道頗類陶基民號無比
取譬羊祜巷哭荆南副軍早垂隆眄其石火瞻斯翠
蓋忽變丹旒方使桓侯石椁載銘盛夏滕令佳城式鐫
韶濩

陳江揔故侍中沈欽墓誌曰早結南陽之親致興沛市
之役四埏多難三江屢梗君敦淳化以勵澆風庶滌清
流以蕩濁俗早邁紫雲萍濡碧海奮里閭之寵躍車馬

之貴晒竇氏之青山恥郭家之金穴

誅魏陳王曹植侍中王粲誄曰惟建安二十三年侍中王
君薨皇穹神察哲人是恃如何靈祇殲我吉士誰謂不
痛早世即冥誰謂不傷華孕中零存已分流天墜同期
朝聞夕沒先民所思何以誄德表之素旛何以贈終哀
以送之強記洽聞幽贊微言文若春華思若涌泉發言
成詠下筆成篇吾與夫子義貫丹青庶幾遐年携手同
征如何奄忽棄我宿零

表梁任孝恭為羊侍中讓表曰搏風扇翮不覺高升擊
水揚鬣遂迷遠大猶願長城巨防射魯仲之書白羽朱
旗振武安之瓦深入五千張空拳以報主橫行十萬勒
燕嶺而酬君

梁邱遲為范衛軍讓梁臺侍中表曰是以懷鉛蚤歲不
以隕獲累心躡履晚坐豈以克詘在念易農伊泰仕焉
已幸遂復分竹九疑擁旄百越值天地中開神武再廓
麻絲是蓄管蒯靡遺今霸運肇基四海明目樞掇規獻

寔在得人况處庸微何用膺荷又為何尚書重讓侍中
領驍騎表曰臣擢自散輩之中寔彼周行之上既慙伯
蒙使天下慎選又乖平叔令内外得人且玉壺獨掌見
榮昌期當尺可叅必簡英俊

梁王筠為從兄讓侍中表曰至如元勳舊儒之冑積德
累仁之基九世七葉之華相韓事漢之資不然則子駿
之學洞古今平子之思侔造化仲宣之辯識無滯次
重之解經不窮然後可以喻旨公卿問對惟展陪六尺

之身通四方之意求之微臣此塗頓隔

梁任昉為王思遠讓侍中表曰行則六尺之內陪接天
光語則親璽申命誠信區宇獻可替否出納惟幾敷表
白於聲華之上進讓於玉堂之下金遷七貴之茂王粲
二公之孫雖復仲蔚孤緒元卿末裔未有不階民譽妄
承曲私者也

北齊邢子才為彭城王韶讓侍中表曰貂鼯映首日月
在前冠蓋庶僚跨躡多士雖智慙量力明闕自知在梁

之譏無得誼華之議素餐之責豈須噉沓之口何悟天
之情眷復延今寵遂摠錄百揆寅亮萬機文昌治本得
失所繫用才長短隆替以之何容以斯寡薄豈得用膺茲忝
啟梁陸倕張侍中啓曰陳力就列不能者止實欲強飯
據鞍自窮心力濡足磨頂少報弘私徒課虛無空延鍾
箭不悟爰降曲慈復叨清顯職司近切任掌摠綸魏選
異才漢求高德官次恪居鮮非民譽仰瞻內省無一可
階

黃門侍郎

漢書百官表曰中黃門有給事黃門位從將軍大夫皆
秦制

漢書曰張禹為太傅有疾成帝臨視拜於牀下禹有少
子在側目之帝知其意於前拜黃門侍郎又曰劉向字
子政宣帝時以中郎為給事黃門侍郎又曰董賢字聖
卿雲陽人為太子舍人隨太子官為郎二歲餘賢傳漏
在殿下為人美麗白皙哀帝望見悅其儀貌識而問之

曰是舍人董賢耶因引上與語拜為黃門侍郎又曰楊雄成帝時為郎至平帝猶為黃門侍郎

漢舊儀曰黃門郎日暮入對青瑣門名曰夕郎

三輔決錄曰杜恕字務伯拜黃門侍郎每直省閤威儀矜嚴又曰卓茂字子康元帝時遊學長安以儒行為給事黃門郎又曰馬后志在克己輔王不以私家干朝廷兄為虎賁中郎將弟為黃門郎訖永平世不遷

魏略曰董遇字季直為黃門侍郎旦夕侍講為天子所

愛信又曰王粲字仲宣山陽人年十七司徒辟詔除黃門侍郎以西京擾亂皆不就又曰夏侯玄字太初少知名弱冠為散騎常侍黃門侍郎嘗進見與皇后弟毛曾竝坐玄恥之不悅形之於色明帝恨之左遷為羽林監又曰鍾毓年十四拜散騎侍郎遷黃門郎

英雄記曰曹純字子和年十六為黃門侍郎

任嘏別傳曰嘏字昭先魏文帝以嘏為黃門郎每納忠言輒手懷其本自在禁省歸不書封文帝嘉其淑慎

王隱晉書曰張華為黃門侍郎博覽圖籍四海之內若指諸掌世祖問華長安千門萬戶畫地便成

齊職儀曰給事黃門侍郎四人秩六百石武冠絳朝服漢有中黃門位從諸大夫秦制也與侍中掌奏文案贊相威儀典署其事

沈約宋書曰給事黃門侍郎秦官也有事郊廟則一人持蓋與侍中俱管門下衆事

墓誌梁元帝黃門侍郎劉孝綽墓誌銘曰蔡墨攸陳有

草有茵梁荆世攢或魏或秦積善餘慶時推俊民孝乎
惟孝其德有鄰曰風曰雅文章動神鶴開阮瑀鵬翥楊
循身茲惟屈扶搖未申人罔石火山有楸椿佳城無曙
寒野方春

誄宋謝莊黃門侍郎劉琨之誄曰秋風散兮涼葉稀出吳
洲兮謝江畿瞻國門兮聳雲路睇雋里兮驚客衣魂終
朝而三奪心一夜而九飛過建春兮背闕庭歷承明兮
去城輦旌徘徊而北係轡逶遲而不轉挽掩隧而辛嘶

驥含愁而鳴俛顧物色之共傷見車徒之相泣

散騎常侍

應劭漢書曰秦官及漢置散騎及中常侍各一人獻可替否也

華嶠集曰散騎以從容侍從承答顧問為職又掌贊詔命平處文籍故前世多參用言語文學之士

王隱晉書曰鄭默為散騎常侍世祖祀南郊侍中已陪乘詔曰使鄭常侍默曰卿知何以得參乘昔州內舉卿

相輩常愧有累清談

七賢傳曰阮籍高貴鄉公以為散騎常侍非其好也

晉中興書曰庾闡有文章才義議者以為宜綜國史於是召為散騎常侍又曰謝萬升平五年詔曰前西中郎萬才義簡亮宜居獻替其為散騎常侍

墓誌梁元帝散騎常侍裴子野墓誌銘曰幾原博聞裁為典墳比良班馬等麗卿雲薰猶既別涇渭以分聖皇御極欽賢盱顧儲后特聖降情文苑既匹嚴朱復同徐

阮如何不慙卜期不遠

誅晉潘岳散騎常侍夏侯湛誄曰英英夫子灼灼其儔
飛辯摘藻華繁玉振疇昔之遊二紀于茲班白携手何
歡如之居吾語爾衆不勝悲人惡俊異世疵文雅執戟
疲揚長沙投賈無位爾高恥居物下子乃洗然變化易
容慨然歎曰道固不同為仁由己匪我求蒙誰毀誰譽
何去何從莫涅匪緇莫磨匪磷子獨正色居屈志申我
聞積善神降之吉宜享遐紀長保天秩如何斯人而有

斯疾曾未知命中年殞卒

晉劉琨散騎常侍劉府君誄曰爰自上葉帝堯之胤堂
堂漢祖豁豁高韻茂載孝景克紹前訓穆矣靖王開國
作鎮惟祖惟父乃光有晉積行累仁世篤忠順是用感
和誕育奇儁叔質英挺金聲玉振嗟乎君侯仍寢斯疾
命不可延中年殞卒衝飈摧華閭風彫實如可贖兮人
百其質存若燭龍銜曜沒若庭燎俱滅搢紳頽範於高
模邦國彌悴於隕哲

表陳徐陵讓散騎常侍表曰臣聞五十知命宗師之格
言六百辭滿通賢之高槩昔墨子諸生褰裳求楚魯連
隱士高論却秦况乎謬蒙知己寧無感激洪私過誤寘
以通班司憲文昌遂諧常伯今者昆吾小器諦視不見
玄黃均天並奏靜聽能聞鐘鼓雖神農分樂岐伯提針
冥衆因緣難可匡救陛下嗣臨寶歷光闡大猷屬意銓
衡留情撫棧燕臺裝玉儻不精真齊客吹竽諒宜澄簡
南郊奉乘當求鄭默之才西省文辭應用羅舍之學

給事中

東方朔記曰東方朔為中郎賜帛百匹拜給事中

漢書曰蕭望之元帝詔望之傳朕八年可賜爵闕內侯
給事中

漢書百官表曰給事中亦加官或大夫博士議郎掌顧問
應對位次中常侍

胡廣曰給事中常侍從左右無員位次侍中之下常侍
或名儒或國親

漢書曰劉向字子政諫議大夫給事

魏略曰邯鄲淳字子淑黃初初為博士給事中

東晉集曰員外侍郎及給事中皆是帝室茂親或貴游子弟

晉武帝詔燕王師陳劭清貞廉潔博通六籍宜在左右以敦儒訓可給事中

荀綽兖州記曰袁準字孝尼有俊才太始中為給事中誅宋顏延之給事中楊瓚誅曰瓚少稟志節資性忠淳

永初之末佐守滑臺獯虜間釁剝司袞瓚立乎將帥
之間以緝華裔之衆疲困相保堅守四旬兵盡器竭斃
於旗下非夫貞壯之氣勇烈之志豈能臨危引義以死
殉節者哉之子之生立績宋皇如彼竹栢負雪懷霜如彼
駢駟親驂衡驤遘兵喪律王略未恢函陝堙阻纏路蒿
萊朔馬東驚胡風南埃帝國斯艱簡賢授才實命楊子
佐師危臺遏矣獯虜乘障犯威鳴驥厲霜羽鎬高輦軼
我河縣俘我洛畿攢鋒成林投鞍為圍師老變形地孤

援閭卒無菽麥馬乏芻秣烈烈揚子在困彌達力雖可窮氣不可奪義立邊疆身終鋒括

中書令

漢書曰馬遷既被刑之後為中書令尊寵在職

臧榮緒晉書曰潘尼性澹退唯以著述為事永興末為中書令

晉諸公贊曰陳准為中書令張華為監准與華俱處機密而准崇之每至宣日有詔書無大小輒先示華了不

厝意華得詔書不以示准又曰懷帝以繆播為中書令朝事莫不諮之人君之所取信於臣下無以尚也

晉中興書曰肅祖以溫嶠為散騎常侍侍講太寧初手詔曰卿既以令望忠允之懷著於周旋且文清而旨遠宜居深密今欲以卿為中書令朝論亦咸以為宜又曰顯宗加王洽中書令帝曰敬和清裁貴重昔為中書郎吾尚小數呼見意甚親之今以為中書令欲共講文章之事也又曰褚裒授衛將軍中書令以中書銓管詔命

不宜以親居之固讓

檀道鸞陽秋曰溫嶠為中書令詔曰中書之職酬對多方斟酌禮宜非唯文疏而已非望士良才何可安居王導表曰臣乞得除中書監專壹所司竭誠保傳惟力是視詔曰昔荀公曾從中書監為尚書令人賀之乃發恚云奪我鳳凰池卿諸人賀我耶願足下處之勿疑王珉別傳曰珉字季琰詔曰新除侍中王珉才學廣瞻理識清通宜處機近以叅時務具以珉為長兼中書令

沈約宋書曰傅亮永初元年為太子詹事中書令專典
詔令以亮任揔國權聽於省中見客神虎門外每旦車
嘗數兩

世語曰司馬景王令尚書令虞松作表輒不可意令更
定松思竭不能改鍾會為定五字松悅服焉

墓誌梁簡文帝中書令臨汝靈侯墓誌銘曰昔太祖時
其惟宣武講道開天儀蒿作輔是曰邢第籍規承矩如
康嗣衛以禽居魯息轡巖隈塗窮夜臺靈檐永閔松路

方開草茂故輒松挿新枚月明泉暗暑往寒來

梁元帝中書令庾肩吾墓誌曰荆山萬重地產卞和之
玉隋流千仞水出靈蛇之珠故能徇茲屈景育斯唐宋
掌庚命族世濟琳琅遂昌開國蟬聯冠冕父易高尚其
道遁肥貞吉闕吏早逢威表真人之氣少微晚映還彰
隱士之星肩吾氣識淹通風神閒逸鍾鼓辭林笙簧文
苑入為度支尚書任同北斗錫韓稜之劔朝比南宮識
鄭崇之履余以其為人也瑚璉之器無慚垂棘杞梓之

材有均廊廟故贈散騎常侍蓋旌賢也

梁張纘中書令蕭子顯墓誌曰君狀貌邱墟風神磊落
閒瞻動于容止英爽發於流盼筆鋒席上皆如素蓄切
問近思見稱閑敏帝嘗顧問君曰我撰通史若成衆史
可廢乃答詔曰仲尼贊易道黜八索述職方除九邱聖
制符同復在茲日儲君毓德少陽情協陳阮親攄妙思
式表玄石

表宋謝莊讓中書令表曰伏惟陛下登取震維臨齊璿

政澤與風翔恩從雲動臣聞壁門天邃鳳沼神深絲綸
王言出納帝命自非望允當時譽宣庠塾未有謬垂曲
寵空席茲榮在於平壯猶不可免况今綿痼百志俱淪

中書侍郎

魏志曰明帝舉中書郎謂吏部尚書盧毓曰得其人與
不得其人在盧生爾選舉莫取有名如畫地作甃不可
噉也毓舉韓暨敦篤至行帝乃用之

王隱晉書曰華表子簡字奉駿有智器文藻官至中書

郎又曰陳壽舉孝廉為著作郎與張華友善華當啓轉中書郎荀勗黨疾壽華語吏部出為長廣太守

臧榮緒晉書曰夏侯孝若為野王令居邑累年朝野多歎其屈除中書郎

曹嘉之晉紀曰汝南史曜為山濤所知曜字季茂父為征南府小吏鄉人周浚一見曜而友之配之妹官至中書郎

沈約晉書曰裴潛風神高邁為中書郎出入禁門見者

皆肅然改容

晉中興書曰范甯為臨淮太守徵拜中書郎專掌西省以職在機近固辭不許多所獻替有益治道

晉起居注詔曰今之士大夫多不樂出宰牧而好內官今皆先經外郡治民著績然後入為常伯中書郎

沈約宋書曰王微與弟綽書曰闔門皆蒙時私吾高臥家巷遂至中書郎此足以闔棺也

王濛別傳曰濛為中書郎在職四年首尾如一人難與

比肩故也

詩齊卞伯玉赴中書詩曰大方信苞容優沉遂不以躍
鱗經鳳池揮翰紫宸裏

表梁庾肩吾為寧國公讓中書表曰臣聞陟彼太行伯
厚之車屢怠望茲吳坂少游之馬難躋是知美非流水
立致摧轅駿匪浮雲便期頓轡起登天漢寧陪九萬之
風坐濟星橋非使千年之翼豈有功稱辯慧足對元禮
弱標後穎能嘲子叔玉重組長空見休寵深宮邃宇孰

知懷憂

驃騎將軍

位次丞相

漢書曰武帝以霍去病為嫖姚校尉征匈奴累有功寵冠羣臣始置驃騎將軍秩與大將軍同

韋昭辯釋名曰驃騎將軍車騎將軍秩皆比三公辯云此三將軍秩本二千石

百官表注曰驃騎將軍漢官也長史司馬各人金章紫綬五時朝武冠佩山玄玉光武中興諸將皆稱大後天

子既定武官悉省

東觀漢記曰其將軍不常置比公者又有驃騎將軍建武二十年復置驃騎將軍位次公有長史一人又曰光武以景丹為驃騎將軍又曰明帝詔曰東平王蒼寬博有謀可以託六尺之孤臨大節而不可奪其以蒼為驃騎將軍又曰永平二十五年左中郎將劉隆為驃騎將軍即日行大將軍事


魏志曰王昶距毋邱儉進位驃騎將軍

世說曰何驃騎弟五以高情避世而驃騎勸令仕對曰
然第五之稱何必驃騎

誄晉張華魏劉驃騎誄曰昔在殷周惟伊惟呂穆穆公
侯紹茲勲緒如何上天殲我鼎輔金剛玉潤水潔冰清
郁郁文彩煥若朝榮功遂身退致仕懸輿志邈留侯心
邁二疎風凜凜以翼衡雲霏霏以承蓋旄聯翩以飄颻
旌繽紛以奄薄

表梁簡文帝讓驃騎揚州刺史表曰常願親侯就列希

同特進之班角弓還地不競龍驤之賞天澤無涯名器
摠集竊以驃騎之官既為上將神州之重實號中土故
以彈麾六戎冠冕九牧豈止可隸絳節金吾提騎況復
任摠皇畿位重連率何則驃騎之號歷選為重元狩之
中始自去病永初之建特授劉蒼齊憲為公主所申吳
漢因羣臣之舉



藝文類聚卷四十八